

041  
6105  
:4



山堂肆考地理第十九卷

○泰山

泰山五嶽之東嶽也。為兗州鎮。在兗州奉符縣。名蓬玄。太空中洞天。唐天文志。降婁玄枵。其神主於岱宗。歲星位焉。

雲闕

漢光武封泰山。雲氣成宮闕。

天門

漢官儀及泰山記。盤道屈曲而上。凡五十餘盤。經小天門。大天門。仰視天門。如從穴中視天。牕山頂西巖。為僊人石閣。東岩為介丘。東南巖名日觀。又東南名秦觀。秦觀者望

青王中

十一世

羅隱錄

見長安。吳觀者望見會稽。周觀者望見齊也。

報功

博物志。泰山一名天孫。言為天帝孫也。五經通義。一曰岱宗。言王者受命易姓。報功告成。必於岱宗也。東方萬物始交代之處。宗長也。言為羣嶽之長也。

紀號

白虎通。王者受命。必封禪。封者。增高也。禪者。廣厚也。皆刻石紀號。著已之功績。以自效也。天以高為尊。地以厚為德。故增泰山之高。以報天。禪梁父之趾。以報地。

魯瞻

詩魯頌。泰山巖巖。魯邦所瞻。

鄭祀

左隱八年。鄭伯請釋泰山之祀。而祀周公。以泰山之祊。易許田。三月。鄭伯使宛來歸祊。不祀泰山也。

堯封

史記。齊桓既霸。會諸侯于葵丘。而欲封禪。管仲曰。古者封泰山。禪梁父。七十二家。而夷吾所記者。十有二焉。昔無懷氏。伏羲氏。神農炎帝。封泰山。禪云云。黃帝封泰山。禪亭。顓頊。帝嚳。堯舜。封泰山。禪云云。禹封泰山。禪會稽。湯封泰山。禪云云。周成王封泰山。禪社首。

虞理

虞書。歲二月。東巡狩。至于岱宗。柴望于山川。注云。柴。燔

柴以祭天也。謂王謂秩以祀山川也。秩者具牲幣祝號之次第。如五嶽視三公。四瀆視諸侯。其餘視伯子男也。

秦松

泰山記。秦始皇上泰山。風雨暴至。休于松樹下。封松為五大夫。按五大夫官名。

漢栢

泰山南有廟。種栢樹千株。大者十五六圍。相傳云漢武所種。

探策

風俗通。代宗上有金篋玉策。能知人壽修短。漢武探策十八。因到讀曰八十。其後果壽長八十。

作丸

劉向列僊傳。崔文子。泰山山人。好黃老術。潛居山下。作黃丸膏藥。有疫氣者。飲藥即愈。

稷丘雍琴

列僊傳。稷丘君者。泰山下道士。漢武東巡泰山。乃擁琴而拜。

張忠鑿金

崔鴻前秦錄。處士張忠。隱於泰山巖棲谷。修道養之法。鑿石為釜。

頭生白光

葛洪神僊傳。泰山下有老父者。失其姓名。漢武東遊。見老

父鉏于道間。頭上生白光。

手翳芝草

曹植飛龍篇。晨遊泰山。雲霧窈窕。心逢二童。顏色鮮好。乘彼白鹿。手翳芝草。

三宮

茅君內傳。僊家凡有三十六洞天。岱宗之洞。周圍三千里。名曰三宮。空洞之天。

五祠

漢書。五嶽皆歲三祠。獨泰山歲五祠。

覽八極

李白遊泰山詩。平明登日觀。舉手開雲關。精神四飛揚。如

出天地間。黃河從西來。窈窕入遠山。馮崖覽八極。目盡長空閑。偶然值青童。綠髮盈雲鬢。笑我晚學僊。蹉跎凋朱顏。躑躅忽不見。浩蕩艱追攀。

小衆山

杜甫望嶽詩。岱宗大如何。齊魯青未了。造化鍾神秀。陰陽割昏曉。盪胸生層雲。決背入飛鳥。會當凌絕頂。一覽衆山小。

○華山

華山。五嶽之西嶽也。為豫州鎮。在華州華陰縣。名太極。總僊洞天。少華山。在華州東南。連太華山。太華山高五千仞。有芙蓉。明星。玉女三峯。蒼龍嶺。黑

瑋瑋音  
徐字驚  
音

龍潭白蓮池。日月崖。及僊掌石月之勝。少華山。其木多荆杞。其獸多野牛。其陽多瑋瑋。鳥多赤鷲。宋時此山嘗自摧。被害者甚衆。今摧處亂石猶存。

少陰

白虎通。西方少陰用事。萬物生華。故曰華山。華山記。山頂有池。生千葉蓮花。服之羽化。因曰華山。

太白

唐天文志。鶉首實沉。其神主於華山。太白位焉。太白山。即鬼谷子授蘇秦佐國之術處。其祠廟在長安。

神傳

韓子曰。秦昭王令工施鈎梯而上華山。以松栢之心為傳。

箭長八尺。棋長八寸。勒之曰。昭王常與天神博於此。

神開

見山巨靈擘開。

重嶺

華山記。華山高崑四合。重嶺秀起。

二岑

述征記。華山有二岑。其高五千仞。廣十里。自小岑迄嶺表。有如削成。

獵師見女

列僊傳。毛女在華陰山中。山客獵師。世世見之。體生毛。自言秦始皇宮人。

度世追父

神僊傳。衛叔卿。常乘鹿駕白鹿。見漢武帝。帝將臣之。叔卿不言而去。帝悔。求得其子度世。令追其父。度世登華嶽。見其父與數人博於石上。勅度世令還。

歸馬

周書。歸馬於華山之陽。放牛於桃林之野。

騎龍

列僊傳。呼子先者。漢中關下卜師。壽百餘歲。臨去呼酒家。媪令急裝。有僊人持二茅狗來。一與子先。一與酒媪。因各騎之。乃龍也。上華陰山。常於山上大呼。言子先酒母在此。

玄仲到頂

華山記。王玄仲欲登蓮花峯。約寺僧云。到峯頂當起。信。翌日持火而登。僧候之。果有烟起。留二旬乃下。僧問之。云峯頂有池。菡萏盛開。其中又有破鐵舟存焉。

文公遊巔

李肇國史補。韓文公遊華嶽之巔。顧視其險絕。恐慄。度不可下。乃發狂慟哭。欲縋遺書以為訣。沈顏謂文公假事諷時。寓意於此。蓋憤趨榮貪位者之若陟懸崖。險不能止。然後嘆不知稅駕之所。焉可及矣。

素車白馬

史記。秦始皇三十六年。秦人鄭容為始皇使。從關東來。至華陰。望見素車白馬。從山上下。知其非人。止道左而待之。

遂持璧與鄭容曰。為我遺瀉池君。今年祖龍死。鄭容問其故。忽不見。置其璧去。注云。瀉池君。水神也。江神以璧遺瀉池之神。告始皇之將終也。秦以水德。故其君將亡。水神先自相告。祖始也。龍君象。謂始皇也。

### 朱鬢紫衣

六帖。唐主車駕次華陰山。見嶽神數里迎謁。上召諸巫問神安在。獨老巫阿馬婆奏云。在路左。朱鬢紫衣。迎候陛下。上顧笑之。及上至廟。見神橐鞬俯伏庭東南大栢樹下。上加禮敬。尋詔先諸嶽封為金天王。

### 受金丹

列僊傳。馬明生從安期先生受金液神丹方。乃入華陰山。

合金液。不樂升天。但服半劑為地僊。

### 鳴石鼓

華山記。山有靈泉二所。一名蒲池泉。一名太上泉。池北有石鼓。父老相傳。嘗有聞其鳴者。

### 通帝座

李白登華山落鴈峯曰。此山最高。呼吸之氣。想通帝座矣。恨不携謝朓驚人詩來。搔首問青天耳。

### 通天門

杜甫望嶽詩。車箱入谷無多路。箭括通天有一門。按華山雲臺上有石盆。可容水數斛。明瑩如玉。俗呼為玉女洗頭盆也。車箱谷箭括門。皆西嶽名跡。登嶽所由之徑也。



熒光休氣

李白雲臺歌送丹丘子曰。西嶽崢嶸何壯哉。黃河如絲天際來。黃河萬里觸山動。盤渦谷轉秦地雷。熒光休氣紛五綵。千年一清聖人在。巨靈咆哮壁兩山。洪波噴流射東海。三峯却立如欲摧。翠崖丹谷高掌開。白帝金精運元氣。石作蓮花雲作臺。

仙草瑤池

張說撰太華山碑銘。踞中土西偏。當七宮正位。是稱西嶽。石壁磔堅而椎竦。衆山奔走而傾附。其氣肅其威振。其行配金。其辰直酉。前對華陽之國。後壓華陽之郡。左抱桃林之塞。右產藍田之玉。諒少昊之下都。卽蓐收之別館也。下

有方士真人金鼎石室。上有明星玉女。僊草瑤池。

王猛隱居

崔鴻前燕錄。王猛隱居華山。聞桓温入關。披褐詣之。捫蝨談當代之事。傍若無人。

陳搏修道

陳搏修道於華山雲臺觀中。大困三十六載。小困一十八春。○嵩高山

嵩高山。五嶽之中嶽也。在洛京王屋縣。名上帝司真洞天。唐天文志。鷄火大火壽星。永常爲中州。其神主於嵩丘。鎮星位焉。白虎通。中嶽獨加高字者。蓋山在四方之中而高。故曰嵩高。

二室

戴延之西征記。嵩山三十六峯。東曰太室。西曰少室。相去十七里。嵩其總名也。謂之室者。下有石室也。少室高八百六十丈。上方十里。與太室相埒。但小耳。漢武帝嘗於太室山中。作登仙臺。萬歲亭。

三臺

雜道書。嶽神廟。東有三臺山。昔漢武帝東巡。過此。見學僊女。即此。

望都峯

嶽之西北一峯。號望都峯。天氣晴暖。即望見洛陽。隱隱如車蓋之狀。六帖。嶽之東北一峯。號雞鳴峯。五更初。便見日出。

擣帛石

五代秦再思記。嵩山之上。有玉女擣帛石。瑩徹光潔。人莫能測。嶽下人云。立秋前一日。中夜常聞杵聲。

生賢左

詩大雅。崧高維嶽。峻極於天。維嶽降神。生甫及申。維周之翰。

封天王

唐書。則天垂拱四年七月。改嵩山為神嶽。封其神為天中王。至萬歲。通天元年辛巳。尊天中王為神嶽天聖皇帝。天靈妃為天中皇后。

神呼

漢武帝詔朕有事華山。至於中嶽獲駁鹿。見夏后啟母石。翌日親登嵩高。御史乘屬車在廟旁。吏卒咸聞呼萬歲者三。登禮罔不容。其令祠官加贈太室祠。禁無伐草木。以山下三百戶為置奉邑。

童謡

五行志。唐高宗調露中始欲封嵩山。屬突厥叛而止。後又欲封。以吐蕃入寇而止。時童謡曰。嵩山凡幾層。不畏登不得。但恐不得登。三度徵兵馬。傍道打騰騰。

許由山

雜道書。東龍門之南有許由山。高大四絕。其北有潁水。乃堯聘許由處。猶有壇墀在焉。

楚客舍

唐杜楚客因建成難作。遁舍嵩山。正觀四年。召為給事中。不應。太宗曰。居山似矣。謂非宰相不起。詎然耶。

靈藪

盧元明記。嵩山為棲神之靈藪。長松翠栢生於嶺間。左右為古人任止處。有銅鈔器物。

仙館

劉義慶世說。嵩山北有大穴。晉時有人誤墮穴中。見二人圍棋。局下有一杯對飲。墮者告以饑渴。棋者曰。可飲此。墮者飲之。氣力十倍。棋者曰。汝欲停此否。墮者曰。不願停。棋者曰。從此兩行。有天井。但投身入井。自當出。若餓。取井中

山堂集卷十九  
物食之墮者如言。可半年乃出。自蜀中歸洛下。問張華。華曰。此僊館也。所飲者玉漿也。所食者龍穴石髓也。

### 盧鴻廣廬

唐開元中。隱士盧鴻。字浩然。隱嵩山。賜隱居服。官為營草堂。到山中。廣學廬。聚徒五百人。嶽頂有中天池。凡絕境處。鴻皆勒銘。

### 李渤築室

唐李渤。築室於少室山中。自號少室山人。唐順宗徵為左拾遺。辭疾不至。

### 溫公題字

聞見錄。司馬公居洛。嘗同范景仁。過韓城。抵登封。憇峻極

下院。登高頂。入崇福宮。會善寺。由鞞轅道。至龍門。遊廣慶。奉先諸寺。上華嚴閣。千佛岩。尋高公堂。渡潛溪。入廣化寺。觀唐郭汾陽鐵像。涉伊水。至香山。黃龕。憩石樓。臨八節灘。過白公影堂。凡所經遊。多有詩。公不喜肩輿。山中亦乘馬。遇路險。策杖以行。故嵩山題字曰。登山有道。徐行則不困。措手于平穩之地。則不跌。其上日遠矣。

### 退之題名

歐陽永叔跋嵩山題名曰。韓退之題名二。皆在洛陽。其一在嵩山。天封宮石柱上。記龍潭遇雷事。天聖中。余與梅聖俞遊嵩山。入天封宮。徘徊柱下而去。遂登山頂。至武后封禪處。有石記戒遊龍潭者。毋笑語。以瀆神龍。龍怒則有雷。

因思退之記遇雷事。意其有所戒也。其一在福先寺塔上。當時所見墨跡。不知其後何人摸刻於石也。

道士種花

漢世道士。從外國將貝多子。來於嵩高山西脚下種之。有  
四樹。與衆木異。一年三花。花白色香美。

鍊師絕穀

李白贈焦鍊師曰。嵩山有神人焦鍊師者。不知何許婦人  
也。又云。生於齊梁時。其年貌可稱五六十。常胎息絕穀。居  
無室廬。遊行若飛。倏忽萬里。世或傳其入東海。登蓬萊。竟  
亦不能測其往也。余訪道少室。盡登三十六峯。聞風有寄。  
灑翰遙贈云。二室寄碧天。三花明綠烟。中有蓬萊客。宛疑

麻姑僊。道在喧莫染。跡高想已遷。時食金蛾蕊。屢讀上真  
篇。八極恣遠憩。九域長周旋。潛光隱嵩山。鍊魄棲霞壑。覽  
裳何歲誕。羽駕轉綿澗。願同西王母。下顧東方朔。紫書倘  
可傳。銘骨誓相學。

使者乘龍

漢武帝內傳。武帝夜夢與李少君俱上嵩山半道。有綉衣  
使者。乘龍持節。從雲中下。言太乙請少君。覺乃告近臣曰。  
如朕夢。少君將舍朕去矣。

王子駕鶴

見七夕

授書

白龜年樂天子也。一日於嵩山東巖下。遇李白曰。吾與汝父皆僊矣。出素書一軸授之曰。讀此可辨九天禽語。九地獸言。龜年一日過潞州。二雀啾啾。過州太守庭。守曰。彼何言。龜年曰。言城西人家有粟。可共食之。驗之果然。

枕襪

見月

○衡山

衡山五嶽之南嶽也。為荊州鎮。在衡州府衡山縣。名朱陵太虛洞天。寰宇記宿當翼軫度應璣衡。故曰衡山。山海經衡山一名岫嶷。唐天文志星紀鶉尾神主衡山。英武位焉。盛弘之荊州記衡山南嶽。

二音

也。至於軒轅。乃以瀟霍二山。為其副焉。漢武南巡。至盛唐山。又以衡山遐遠阻江。乃移嶽神於霍而祭焉。亦承軒轅二山為副之義也。

下踞離宮

六帖。上承寘宿。銓德鈞物。下踞離宮。攝位大卿。

上有飛泉

荊州記。衡山有三峯。極秀獨一峯。名芙蓉者。最為竦傑。非清霽之朝。不可見。峰上有飛泉。如一幅練。分映青林。直注山下。

位列三公

六帖。名備五嶽。位列三公。劉向說苑。五嶽何以視三公。能

大布雲雨焉。能大歛雲雨焉。觸石而出。膚寸而合。不崇朝而雨天下。施德博大。故視三公。

禮自百王

剡音旭  
頌洪上  
聲

杜甫望嶽詩。南嶽配朱鳥。秩禮自百王。剡吸領地靈。頌洞半炎方。邦家用祀典。在德非馨香。巡狩何寂寥。有虞今則亡。

紫蓋

寰宇記。衡山盤繞八百里。有七十二峯。十洞。十五巖。三十八泉。二十五溪。九池。九潭。九井。而峯之最大者五。曰祝融。曰紫蓋。曰芙蓉。曰石廩。曰天柱。惟祝融為最高。

朱陵

南嶽文。衡州南嶽者。朱陵之靈臺。太虛之寶洞。赤帝館。其嶺。祝融宅。其陽。

九向九背

羅含湘中記。衡山遙望如陣雲。沿湘千里。九向九背。乃不復見。

一開一閉

臧榮緒晉書。劉璘之好遊山。澤採藥。至衡山。深入忘返。見一澗水。水南有二石困。一開一閉。水深不得過。

聞絃歌聲

湘中記。衡山九疑山。皆有舜廟。太守至官。常遣戶曹致敬。修祀。如有絃歌之聲。

得金玉書

趙曄吳越春秋禹傷父功不成乃東巡登衡山血白馬以祭之仰天而嘯忽然而臥夢赤綉文衣男子自稱蒼水使者謂曰欲得我山神書請齋於黃帝之嶽禹乃退齋三日登委宛山發石得金簡玉字之書言治水之要因刻石於山之高處

迴鴈

埤雅鴻鴈南翔不過衡山衡山之旁有迴鴈峯蓋南地極燠人子識雪故鴈望衡山則止唐杜荀鶴詩猿到夜寒啼嶽麓馬知春信別衡陽

拂鳥

劉禹錫望衡嶽詩東南倚蓋卑維嶽資柱石前當祝融焉上拂朱鳥翮青冥結精氣磅礴宣地脉還聞膚寸陰能致彌天澤

神禹碑

韓退之題岫嶽山詩岫嶽山尖神禹碑字青石赤形摹竒科斗拳身薤葉披鸞飄鳳泊拏虎螭事嚴跡恠鬼莫窺道人獨上偶見之我來咨嗟涕漣漣千搜萬索何處有森森綠樹猿猱悲

祝融峰

朱元晦醉下祝融峰詩我來萬里駕長風絕壁層雲許盪胸濁酒三盃豪氣發朗吟飛下祝融峰又青瑣祝融峰詩

泗音而  
猴音鏡



一千里地盡皆見七十二峰中最高。

宗炳結宇

孫嚴宋書宗炳字少文好山水愛遠遊西陟荆巫南登衡岳因結宇衡山有懷尚平之志以疾還江陵嘆曰老疾俱至名山恐難徧觀惟當澄懷觀道臥以遊之凡所遊履皆圖於室謂人曰撫琴動操欲令衆山皆嚮。

杜甫遊祠

杜甫大曆中出瞿唐下江陵沂沅湘以登衡山因客耒陽遊嶽祠為暴雨所阻旬日不得食。

李泌願歸

唐李泌畏禍願歸衡山詔給三品祿賜隱士服為置室廬

以居之泌在衡山事明瓚禪師。

韓愈默禱

韓愈謁南嶽廟詩五嶽祭秩皆三公四方環鎮嵩當中火維地荒足妖怪天假神柄專其雄噴雲泄霧藏半腹雖有絕頂誰能窮我來正逢秋雨節陰氣晦昧無清風潛心默禱若有應豈非正直皆感通須臾靜掃衆峰出仰見突兀撐青空蘇東坡潮州韓文公廟碑能開衡山之雲而不能回憲宗之惑

○常山

常山五嶽之北嶽也為并州鎮在定州常山縣名太乙總玄洞天爾雅常山謂之恒山五嶽圖恒山

高三千九百丈七尺。上方三十里。周回三千里。白虎通。北方為常山者。何陰終陽始。其道常久。故曰常山。唐天文志。大梁析木。其神主於常山。辰星位焉。

畢昴之精

春秋元命苞。畢星散為冀州。分為趙國。立為常山。注。常山是畢昴之精。

趙代之境

常山居趙代之境。管子曰。其山北臨代。南俯趙。東接河漢之間。

藏符

史記。趙簡子告諸子曰。吾藏寶符於常山上。往得者。立為後。諸子皆競往。無所得。毋卹還奏曰。常山臨代。代可取也。簡子曰。是知符矣。乃廢太子伯魯。而立毋卹為後。得玉。

崔鴻前燕錄。慕容儁壽光二年。常山寺。大樹根下。得璧七十。圭七十三。光色精奇。有異常玉。以為神嶽之命。以太牢祠之。

昌容得道

列僊傳。昌容者。常山道士。自稱殷王女。食蓬萊根。往來山下。見者二百餘年。顏色如二十許人。

文成禮神

後魏書。道武立廟於常山上。置侍祀九十人。歲時祈禱水旱。至文成帝東巡。親禮其神焉。

蛇曰率然

孫子兵法。常山之蛇。名曰率然。一身而兩頭。擊其一頭。則一頭至。擊其中。則兩頭俱至。

草名神護

神農本草。常山有草名神護。置之門上。每夜叱人。

乾門坤軸

唐張嘉貞恒山碑銘。包括綿長。經綸中外。外夷有四。昴宿主胡。則延袤以限之。中郡有五。寶符在代。則高襄以臨之。其項也。上秩乾門。黑帝之宮。觀其足也。下擦坤軸。玄神之

都府

幽澗飛泉

唐太宗祭常山文。絕壁千尋。孤峰萬仞。桂花浸月。松蘿挂雲。幽澗冬暄。飛泉夏冷。寶符臨代。邦之美。靈蛇表陣。勢之奇。鑠石七年。無以虧其大。含波九載。不能損其高。巍巍乎與乾坤而永固。隱隱乎橫古今而不絕。

石

學音恪  
噉音堯

釋名。山體曰石。山多大石曰礧。學也。山多小石曰噉。噉堯也。

土精

楊泉物理論。土精為石。石氣之核也。氣之生石。猶人筋絡

之生爪牙也。

地骨

默音統

見地。又石名雲根。古詩默默布雲根。林森散雨足。蓋雲生於石故名。

泗濱浮磬

夏書。泗濱浮磬。注云。浮磬者。石露水濱。若浮於水也。故名。泗水名。即今徐州。

條支和丹

洞冥記。漢元鼎中。條支國貢異石。以和九轉丹。髮白者以石拭之。應手而黑。

興安櫛履

荆州記。興安縣水邊有平石。其上有石櫛石履各一。俗云。越王渡溪。脫履墮櫛於此。

饒州倉困

鄱陽記。錢倉石。在饒州。石形如倉困。昔漁人夜宿石上。忽見石開。窺其中有錢。取之盈舫。因名錢倉。

猫睛

猫睛石。出三佛齊國。瑩潔明透。如猫眼睛。

龜背

贛州興國縣之儒林鄉。有石圓如龜。頂背皆具。人謂之龜背石。彷彿八卦形象。逐月隨斗杓旋轉。土人疑其性。移置他所。翌日復歸其處。人因祀之。

宋隕

左僖十六年春隕石於宋五。

晉言

左昭八年石言於晉魏榆。晉侯問於師曠曰石何故言。對曰石不能言。或馮焉。不然民聽濫也。臣又聞之作事不時。怨讟動於民。則有非言之物而言。今宮室崇侈。民力彫盡。怨讟並作。莫保其性。石言不亦宜乎。於是晉侯方築虎祁之宮。叔向曰子野之言。君子哉。

石走

五行志。資州有石方丈。走行數步。

石移

宋史。福清石竹山有大石自移。石方九尺。所過成蹊。

叱羊

見山

射虎

韓詩外傳。楚熊渠子夜行。見寢石。以為伏虎。彎弓而射之。沒金飲羽。下視之。乃石也。因復射之。矢躍無迹。與李廣事同。

燕啣

西京雜記。竇太后在家。嘗有白燕啣石。大如指。墮后續籠中。后取石剖為二。中有文曰。母天下。后乃合之。遂不復開。後為皇后。常並置壘積中。號曰天壘。

魚化

水經注。范文本。日南西捲縣奴也。為奴時。牧於澗中。得兩鯉魚。欲私食之。即知詰文。文詐云。將礪石還。非魚也。即至魚所。果見兩石。文異之。石有鐵文。因入山中。就石治鐵。作兩刀。舉刀向石。鄣呪曰。鯉魚變化。治石成刀。斫石鄣破者。是有靈神。文當治此。因斫石。鄣如龍淵。干將之斬蘆芻。遂君其地。

昆吾作劍

十洲記。流州在西海中。上有昆吾石。治之成鐵。作劍。光明洞照。如水精狀。割玉如泥土。

臨賀磨刀

荆州記。臨賀有青石。上有磨刀斧之迹。春夏明淨。秋冬蒸穢。云是雷公磨刀石。

望夫

神異記。武昌山北有望夫石。狀若人。俗傳昔有貞婦。其夫從役遠赴國難。携弱子餞送此山。立望夫而死。化為立石。因名焉。

化女

幽明錄。陽羨縣小吏吳龕。嘗於溪邊。見五色浮石。因取納牀頭。至夜化成女子。

乞子

郡國志。馬湖南岸。東西有二石。東石腹中。出一小石。西石

熨音亟

腹中懷一小石。故熨人乞子於此。有驗。因號乞子石。

憇僊

酉陽雜俎。荊州利水間。有二石若闕。名曰韶石。晉永和中有飛僊。衣冠如雪。各憇一石。旬日而去。

玉女擣帛

見嵩高山。

玉女揜扉

晏殊類要。保寧府蟠龍山南有一石。長四十丈。高五尺。中有戶及門扉。若人揜扉然。號曰玉女房。

子荆礪齒

晉書。孫楚。字子荆。與王武子善。少時謂武子曰。當枕石漱

流。誤云。漱石枕流。武子曰。流非可枕。石非可漱。楚曰。枕流欲洗其耳。漱石欲礪其齒。

媯皓叩頭

東漢吳郡媯皓。父為南郡。坐事繫獄。皓懷小石。至公卿門。輒出石叩頭。流血覆面。父遂得免。

文若馬牛

魏畧。梁州柳谷有石。無故自崩。有文如馬牛之狀。乃司馬氏得天下之應也。

象如龍鳳

零陵志。石屏出零陵白鶴山。屈處靜。上昇之所。紹興間有宗子。一日。艤舟山下。於水中得一石。光彩絢異。紋若峯巒。

聳秀渾然天成自是石工鑿取益衆其烟雲雪月之景波瀾龍鳳之象隱然可觀雖巧畫者莫臻其妙。

淵明醉眠

廬山記陶淵明所居栗里有大石淵明嘗醉眠其上名曰醉石。

德裕醉踞

唐余錄李德裕於平泉別墅採天下珍木恠石爲園池之觀有醒酒石德裕尤所寶惜醉卽踞之唐莊宗朝張全義爲太師兼四鎮節度有監軍嘗得平泉醒酒石德裕孫延古託全義復求之監軍憤曰自黃巢亂後洛陽園宅無復能守豈獨平泉一石哉全義嘗在賊巢中以爲譏已大怒

答殺之。

雞鳴

夷堅續志分寧陳南山莊有槌藁石陳夜步月忽聞雞鳴於石上卽而視之不見移石於數步外至次宿鳴如故復携石以歸置之月下雞必鳴其子剖視之中有雌雄二雞文采可觀。

鵲噪

夷堅續志宋宮有靈鵲石石中有鵲每天將明聞其噪聲宋南渡得之晉州。

神鉦

述異記洞庭山石樓下有兩石扣之聲響如鉦人呼曰神



山堂集卷之十  
鈺

僊鏡

六帖。月林國西南有恠石。方數百里。光明澄徹。可鑒人五臟六腑。謂之僊人鏡。其國人有疾。照之。其形遂知。

有女浣衣

郡國志。梁州有女郎山。張魯女浣衣於石上。女便懷孕。生二龍。及女歿。將殯。柩車忽騰躍升此山。遂葬焉。

如人攘袂

幽明錄。宜都建平二郡之界。有五六峯。參差互出。上有奇石。如二人像。攘袂相對。俗謂二郡督郵爭界。

昆明刻鯨

西京雜記。漢武帝昆明池養魚。往往飛去。後刻石為鯨。置水中。魚乃不飛。每雷雨。鯨嘗鳴吼。

廬山飛鴈

潯陽記。廬山頂上有池。中有三石鴈。霜降則飛。

狗吠

郡國志。宋武北伐南燕。至吠狗山。夜聞狗吠。明日視之。見石狗馬。

犀沉

蜀郡有水災。太守李冰乃刻石犀沉之江。以厭洪水。

踞之草制

唐書。薛元超。道衡孫也。為中書舍人。中書省有一大盤石。

初道衡為內史侍郎嘗踞而草制超每見石輒泣然流涕  
愛而為銘

白居易集洛陽履道里弘農楊正一遺樂天以盤石方丈  
平滑可以坐臥樂天愛而為之銘

驅海

見日

拋空

獨異記唐中宗為天后廢為廬陵王仰天而嘆因拋一石  
於空心祝之曰我復帝此石不落其石遂為樹枝勾掛

呼曰石丈

石林燕語米芾字元章性好竒知魚為軍初入州廨見立

石頗竒喜曰此足以當吾拜遂命取袍笏拜之每呼曰石  
丈遂為言官所彈

號為石賢

封氏見聞記有古墓前石人以肉祭之能愈疾因號為石  
賢士又蜀中記隗叔通楚人也性至孝母每食必須江水  
水深難汲一旦水中石為之出叔通因之以汲今江中有  
石號孝子石

掛帶

揮塵錄政和間靈璧縣貢一巨石高二十餘尺周圍稱是  
舟載至京師毀水門樓以入千夫舁之不動或啟於上云  
此神物也宜表異之裕陵親灑宸翰仍以金帶一條掛其

上遂即可移。省夫力一半。頃刻至苑中。

作樽

唐元結集道州東左湖有小石山。山巔有宍石。可以作樽。  
宍音蛙名宍樽石。又作亭於樽上。

仲庶救護

楊公筆錄金陵有三大石甚古。吳仲庶作守日。夜夢三舉子求哀。且曰。若不垂佑。當為煨燼矣。公甚異之。詰日徧問。莫能原其意。既而視牒。見兵馬司狀申乞燒三石為灰。供修造之用。遂悟。救寺僧愛護。元祐中毛漸作漕。欲移置廨舍。掘之極深。而石根不斷。乃罷。

虞愿往觀

齊書虞愿為晉平太守。海邊有越王石。嘗隱蔽雲霧。相傳清庶太守乃得見。愿往觀。則清徹無隱蔽。

豫章熟炊

異志豫章有石黃白色。而理疎。以水灌之便熟。安鼎其上。炊足以熟。冷則復灌之。雷煥以問張華。華曰。然石也。

汶山得鹽

華陽國志汶山有鹽石。煎之得鹽。

五如

五如石。在道州城東。唐元結序。泮泉之陽。得恠石焉。左右前後。及登石巔。皆相似。故名曰五如石。并建五如亭於此。  
三品

泮音  
音

上元縣東北同泰寺。卽梁武帝捨身處。寺前有醜石四。各高丈餘。陳封石爲三品。俗呼爲三品石。王安石詩。草沒苔侵棄道周。誤恩三品竟何酬。國亡今日頑無耻。似謂當年不與謀。

似芙蓉

名山志芙蓉渚。有聳石如初生芙蓉。色青白。

名霹靂

僭音津。玄中記。王門西南有一國。國中有山。石礮數千枚。名爲霹靂。從春雷而礮減。至秋礮盡。

雞冠

長沙縣北江濱石。其形高聳似雞冠。

馬蹄

湘潭縣錦灣之側。有石如馬蹄。又漢元鼎間。鄧支國貢馬肝石百升。以之拭髮。白者皆黑。帝坐羣臣於甘泉殿。有髮白者。以此石拭之。應手皆黑。是時公卿語曰。不願作方伯。惟願拭肝石。

董威寢所

晉陽秋。董威遁去。不知所之。於其寢所得一石。及詩二首。

趙岐墓前

東漢趙岐曰。吾死後。置一圓石於墓前。刻曰。漢有逸人。姓趙名岐。有志無時。命也如何。

大秦九色

魏畧大秦國以石為城郭出九色玉石。

相廬一指

相廬縣有石長一丈高五尺綴巖谷間以一指抵之則搖動人力多則不能動故以一指名之。

僧孺蓄奇

唐牛僧孺字思黯封奇章公治第洛之歸仁里好蓄奇石以甲乙丙丁為品每品有上中下三等各刻於石陰。

正臣蓄異

東坡詩集湖口人李正臣蓄異石九峯玲瓏宛轉天成儼若牕櫺名之曰壺中九峯。

覆書

吳越春秋禹按黃帝中經見聖人所記在九疑山東南號曰委宛承以文玉覆以磐石禹齋三日發石取之得金簡玉字之書然後知百川之理。

成字

唐貞觀十七年八月梁州昌松縣鴻池谷有石青質白文成字八十八太宗遣使祭之曰天有成命表瑞貞石文字昭然歷數惟永又二十年陝西有石成字曰李君王開元十九年河南登封縣石文舊有帝字新生上字。

山水草木之形

大理府點蒼山出石白質黑文有山水草木之形温潤如玉可琢為屏。

人物溪橋之狀

階州北峽中有石青質黑理其文有松栢人物溪橋水石山林樓閣日月之狀

吳越春秋... 山堂肆考

山堂肆考地理第二十卷

○海

博物志。天地四方皆與海水相通。地在其中。蓋無幾也。四海之外皆復有海。東海之別有渤海。溟海。員海。通謂之滄海。南海之別有漲海。西海之別有蒲昌海。蒲類海。青海。鹿渾海。陽池海。北海之別有瀚海。瀚海之南有勃鞞海。伊連海。凡四海通謂之裨海。裨海外復有大瀛海環之。又海曰朝夕池。一云天池。一云大壑。海神曰海若。

善下

老子曰。江海所以能為百谷王者。以其善下之也。

鞞音低

引晦

劉熙釋名。海晦也。主引晦濁。其水黑而晦也。

地脉

關令內傳。天有五億五萬五千五百五十里。地亦如之。各以四海為脉。

地紀

文選。地以四海為紀。

浮天

漱音尤  
湫音亦  
漱音欽  
冲音冲  
沉音杭  
炭音炭

木玄虛海賦。於廓靈海。長為委輸。其為狀也。則乃漱湫漱。灑浮天。無岸冲融。沉灌渺彌。波漫波如連山。乍合乍散。噓噓百川。洗滌淮漢。襄陽廣鳥。溇瀆浩汗。木華。字玄虛。晉人。

膠音膠  
瀉音葛

浴日

柳元宗文。今夫大海。其東無東。其西無西。其北無北。其南無南。旦則浴日而西。之夜則浴列星。涵太陰。揚陰火。珠寶之光。以明。而塵靈之雜。不處也。

品物類生

木玄虛賦。其為器也。包軋之奧。括坤之區。惟神是宅。亦祇是廬。何奇不育。何恠不儲。茫茫積流。含形內虛。曠哉坎德。卑以自居。弘往納來。以宗以都。品物類生。何有。何無。

流波相薄

莊子曰。海水三歲一周。流波相薄。即為之地動。

蓬嶼

李顥凌僊賦。瞻蓬萊之秀嶼。靈東叟之可尋。將乍至而反  
陸。患巨浪之相臨。

桑田

葛洪神僊傳。麻姑謂王方平曰。自接待以來。見東海三變  
為桑田。向到蓬萊。水乃淺於往者。畧相半也。豈復將為陵  
谷乎。方平乃曰。東海行復揚塵耳。

鮫室

畢音寅木玄虛賦。其垠則有天琛水恠。鮫人之室。按北夢瑣言。鮫  
人泉客。織鮫綃帕於水室。賣與人間。昔張建章為幽城司  
馬。曾以府命行渤海。遇水僊。遺鮫綃帕。夏月溽暑。展帕滿  
堂凜然。

蜃樓

漢書。海傍有蜃氣。為樓臺之狀。

海不揚波

考音者周成王時。越裳氏重譯來朝。譯曰。吾受命吾國之苗。考天  
魚烈風淫雨。海不揚波三年矣。意者中國有聖人乎。蓋往  
朝之。按越裳在交趾之南。阮昌齡作海不揚波賦。其畧云。  
碣音傑收碣石之宿霧。歛蒼梧之夕雲。八月靈槎泛寒光而靜去。  
三山神闕湛清影以逍遙。

海不擇流

秦李斯曰。泰山不讓土壤。故能成其大。河海不擇細流。故  
能就其深。



出雲雨

公羊傳海千里潤注云海出雲雨及千里也。

受露霧

孫卿子曰海受露霧故能成其深。

百川學

揚子法言百川學海而至於海丘陵學山而不至於山。

萬川歸

莊子曰北海若謂河伯曰天下之水莫大於海萬川歸之不知何時止而不盈尾閭泄之不知何時已而不虛列子曰渤海之東有大壑焉實惟無底之谷名曰歸墟八紘九野之水天漢之流莫不注之而魚鱉無滅焉注云歸墟即

尾閭也。

三神山

博物志滄海之中有蓬萊方丈瀛洲三神山以金銀為宮闕僊人所集也

九老都

十洲記滄海島中有紫石宮室九老僊都。

弗溢弗損

垢音次

莊子曰東海之蟹語垢并之蛙曰夫海千里之遠不足以舉其大千仞之高不足以極其深禹之時十年九潦而水弗加溢湯之時八年七旱而涯不加損此東海之大樂也

不滿不竭

莊子曰。諄芒遇苑風於大海之濱。苑風曰。子將奚之。曰。將之大壑。大壑之爲物也。注焉而不滿。酌焉而不竭。

迴地軸

隋楊師道望海詩。洪波迴地軸。孤嶼映雲光。落日驚濤上。浮天駭浪長。僊臺隱螭駕。水府汎鼉梁。碣石朝烟滅。之采歸鴈翔。

浹天墟

宋吳淑海賦。浹天墟而浮析木。薄碣石而蕩之采。

審知招商

六帖王審知欲招蠻夷商賈。海上波濤爲沮。一夕風雨雷電震擊。開以爲港。閩人以為審知德政所致。號爲甘棠港。

王勃省父

唐王勃父福時。由雍州參軍遷交趾令。勃往省父渡海。溺水而卒。

乘桴浮海

漢應邵風俗通。姜肱字伯淮。靈帝踐祚。徵肱爲太守。肱告人曰。吾以虛獲實。縊藉聲價。盛明之際。尚不委質。今政在私門。夫何爲哉。遂乘桴浮於海。莫知其極。

抱板泛海

隋封德彝之少也。僕射楊素竒之。妻以姪女。常撫座曰。封即必居此座。後德彝討遼東。舟沒。衆謂必死。素曰。封即當得僕射。未必死。求之。封因抱一板泛海中。力盡欲放。忽憶

楊公言。勉力持之。胸前為板所摩。肉破至骨。衆救得免。後官果至。僕射。

齊景樂治

說苑齊景公遊海上而樂之。六月不歸。告左右曰。敢言先歸者死。顏蠲進曰。君樂治海。不樂治國。彼若有治國者。君安能樂此海乎。遂歸。至中道。聞國人謀將不納之。

盧敖窮觀

淮南子曰。盧敖遊於北海。經乎太陰。入乎玄關。至於蒙穀之上。見一士焉。深目而玄鬚。淚注而鳶肩。豐上而殺下。方捲龜殼而食蛤蜊。敖就與之語曰。唯敖為背羣離黨窮觀於六合之外。周行四極。唯北陰之未窺。子殆可與敖為友。

益音春  
良音浪

胸音絢

乎。若士者。蓋然而嘆曰。嘻。我南遊乎罔罟之野。北息乎沉墨之鄉。西窮宵冥之黨。東開鴻濛之光。此其下無地。而上無天。聽焉無聞。視焉無物。今子遊始於此。乃語窮觀。豈不遠哉。然子處矣。吾與汗漫期於九垓之外。乃舉臂而竦身。遂入雲中。按敖燕人。秦始皇召為博士。使求神僊。亡而不返。汗漫無紀極也。九垓九天也。

徐福尋僊

徐福。字君房。秦始皇遣福及童男女二千人入海尋神僊。不返。唐開元中。有人於海中見之。

陳茂罵神

謝承後漢書汝南陳茂。嘗為交趾別駕。刺史周敞涉海遇

風船欲覆沒。拔劍呵罵水神。風即息。

### 海中紅旗

宋趙鼎謫朱崖。自雷州浮海而南。顧見洪濤間紅旗靡靡。相逐而下。疑爲海寇。或外國兵甲。呼問舟人。舟人搖手。令勿語。恐怖之色可掬。急入舟。被髮持刀。出蓬背。立割其舌。出血滴水中。戒使臣閉目坐船內。凡經兩時。頃聞舟人相呼曰。更生更生。乃言曰。朝來所見。蓋巨鱗也。平生未嘗覩。所謂紅旗者此耳。

### 海中陰火

嶺表錄異。海中取魚。置陰處。有光。初見以爲怪。推其義。蓋鹹水所生。凡海中水。遇陰晦。波如燃火。滿海以物擊之。

遊散如星。有月即不復見。木玄虛賦。陰火潛燃。豈謂是乎。

### 過海思愆

周景式孝子傳。管寧字幼安。避地遼東。過海。遇風。船人危懼。皆悔過。寧思惟外愆。念昔年嘗如廁。不冠而已。向天叩頭。風亦尋息。

### 入海留語

唐讓皇帝穆宗親兄。不爲太后所愛。故穆宗越次而立。讓皇不肯。臣穆宗。遂造船入海。不知其處。臨入海時。留語四句。今刻在玉碑上云。小山壓大山。大山全無氣。羞見本邦人。將身投外裔。

### 煮石濟饑

靚音靜晉書鮑靚為南海太守行部過海遇風饑甚取白石煮食之以濟按靚女為葛洪妻善灸贅疣

鑿石開道

北夢瑣言交趾以北距南海有水路多覆舟高駢往視之乃有橫石隱在水中因奏以開鑿海道之利詔聽之乃乃工者啖以厚利竟去其石至今賴之

翻岸倒雲

濱海之人遠望海水似高於地有如岸焉蓋水氣也故隋煬帝望海詩遠水翻如岸遙山倒似雲

積流疏派

唐太宗望海詩積流橫地紀疏派引天潢僊氣凝三嶺和

風扇八荒拂潮雲布色穿浪日舒光照岸花分彩迷雲馬斷行

馬銜當蹊

玄虛賦若其負穢臨深虛誓愆期則有海童邀路馬銜當蹊天吳乍見而髣髴蛭象暫曉而闕屐注云海童馬銜並海中神恠

精衛填石

見山發鳩山

慕容征郭

王隱晉書慕容晃上言曰正月十三日臣躬征郭遠假陛下天地之威將士竭命精誠感格海為結冰凌行海中三

百餘里。臣及諸老言。自立國以來。無海水冰凍之歲。風俗通曰。積冰曰凌。冰壯曰凍。

希堯使吳

五代史。段希堯使吳越。過海遭大風。左右皆恐怖。希堯曰。吾平生不欺。汝等恃吾。可無恐也。已而風止。

色如爛椹

杜陽雜編。南昌國有紫海水。色如爛椹。可以染衣。其魚龍龜鱉沙石草木。無不紫者。又十洲記。東有碧海。廣狹與東海等。水鹹苦。正碧色。

氣如圓窰

晉書。東海氣如圓窰。窰。宏潤貌。與崢嶸同。今編畫在竹格。

窰音燈  
一作懷

曰窰。又海船渡海。須當候氣。見黃氣。知有人烟國土。見白氣。知有山峯巖壑。見黑氣。則水也。

沙門島

沙門島。在登州府城西六十里海中。凡海舟渡遼者。必泊此以避風。宋時嘗流放罪人於此。其巖磯牽牛。大竹。小竹。四島皆與此島相連屬。紫翠巉絕。出沒波濤中。直神僊所宅也。上生白芝。又多美石。見蘇軾北海十二石記。

海門島

海門島。在通州南四十里海中。宋長編。國初犯死獲貸者。多配隸於海門島。有屯兵使者領護之。

海運

宋季有海盜朱清者。嘗為富家傭。殺其主。亡入海島。與其徒張瑄。乘舟抄掠海上。備知海道曲折。尋就招懷。為防海義民元伯顏平宋時。遣清等載宋庫藏諸物。從海道入京。師授金符千戶。二人遂言海道可通。乃命總管羅璧暨瑄等。造船六十艘。運糧四萬六千餘石。入京師。然創行海洋。亦逾年始至。朝廷不知其利。仍通舊運。尋因忙兀解言海運為便。遂立萬戶府四總其事。又併四府為都漕運萬戶府。命清瑄二人掌之。至成宗大德六年。二人被江南僧石祖進。摭其交番不法等事。伏誅。按輟耕錄。引杜工部出塞詩。漁陽豪俠地。擊鼓吹笙竽。雲帆轉遼海。粳稻來東吳。昔遊詩。幽燕盛用武。供給亦勞哉。吳門持粟帛。泛海凌蓬萊。

解擡上  
声

觀此二詩。則唐時已有海運。朱張特舉行之耳。朱張皆揚州府通州人。

海市

登州府四面皆海。春夏時。遙見水面有城廓市肆。人馬往來。若交易狀。土人謂之海市。蘇東坡云。予聞登州海市舊矣。常以不見為恨。乃禱於海神廟。明日果見之。有詩云。東方雲海空復空。羣僊出沒空明中。蕩搖浮世生萬象。豈有貝闕藏珠宮。心知所見皆幻影。敢以耳目煩神工。歲寒水冷。天地閉。為我起。鰲鞭魚龍。重樓翠阜出霜曉。異事驚倒百歲翁。

海溢

海溢。一曰海嘯。東漢質帝本初元年。夏四月海水溢。桓帝永康元年八月海溢。靈帝建寧四年二月海溢。梁武帝普通元年江淮海溢。唐高宗顯慶元年九月括州大風海溢。總章二年九月大風海溢。漂沒六千餘家。宋元豐四年七月甲午夜靜海海門大風雨。沿海官私廬舍。漂沒二千七百三十有六。元大德五年暴風。江海大水大溢。高四五丈。崇寧通泰真州沿江之地被災者三萬四千八百餘戶。皇慶二年八月崇明州大風海溢。泰定三年十一月崇明海門等處海溢。至正元年通泰等州海溢。溺死一千六百餘人。

海乾

唐道士葉靜能。有白衣老父。泣拜曰。被胡僧來呪水。海水十涸七八。靜能使朱衣人執黃符。往投之。海水復舊。老父乃龍也。

海眼

唐金華子。北海縣因祭地。得五銖錢。取之不盡。中得一石。記云。此是海眼。以錢鎮之。衆懼。復掩之。

海影

酉陽雜俎。海影翻側。言影倒懸也。

江

釋名。江者。公也。諸水流入其中。所公共也。禹貢三。江既入震澤。底定。注云。松江下七十里。分流東北。



涪音浮

入海者為婁江。東南流者為東江。併松江為三江。或云岷山為大江。至九江為中江。至徐陵江為北江。蓋一源而三目也。周禮職方氏東南曰揚州。其川三江。三江者東行至揚州復分為三道而入海。故揚州有三江也。蜀之三江則外水岷江。中水涪江。內水沱江也。禹貢九江孔殷。九江即今之洞庭。在長沙下雋西北。今沅水。漸水。元水。辰水。叙水。酉水。澧水。資水。湘水。皆合於洞庭是也。潯陽記九江一烏白江。二蟠江。三烏土江。四嘉靡江。五歛江。六浮江。七廩江。八提江。九茵江。是也。枚乘七發觀廣陵之曲江。今揚州是也。始興郡有曲江。今韶州是也。

蟠音棒

也。廣雅江神謂之奇相。

龍負舟

呂氏春秋大禹南省方濟江黃龍負舟。

鼃為梁

紀年周穆王東巡至九江叱鼃鼃以為梁。

得萍實

家語楚昭王渡江有物大如斗圓而赤直觸王舟舟人取之王大恠使人之魯問孔子孔子曰此萍實也可剖而食之吉惟霸者能獲之使返王邊食之甚美。

採菱華

傳玄歌有女殊代生涉江採菱華又郭璞江賦水物恠錯。

則有玉珧海月土肉石華。

弔屈

楊雄字子雲成都人其作書往往摭離騷而反之自岷投諸江流以弔屈原。

罵胥

漢書吳郡王閔渡錢塘江遭風船欲覆閔拔劍砍水罵伍子胥風遂息得濟。

鼓楫過江

漢建初中張禹拜揚州刺史過江行部中土人皆以江有子胥之神難於濟涉禹厲聲言曰子胥如有靈知吾志在理察枉獄豈危我哉遂鼓楫而過郡邑深幽之處莫不畢

到

擊楫渡江

晉祖逖為奮威將軍北渡江中流擊楫而誓曰不清中原而復濟者有如此江。

龍明

龍門江在安南嘉興州蒙縣源出雲南寧遠州至此橫截江流中分三道飛湍聲聞百里傍有穴多出鸚鵡魚色青綠口曲似鸚鵡嘴。

馬湖

馬湖江在叙州府城南源出沈黎實大度之支流也亦名瀘水一名金沙江諸葛亮渡瀘卽此江之上流也。

家語江水始出岷山其源可以濫觴及其至於江津不方舟不避風不可以涉

縈帶

袁崧宜都記對西陵南岸有山其峯最孤秀人自山南上至頂俯臨大江如縈帶視舟船如鳧鴈

待符

楚昭王出遊留夫人貞姜於漸臺江水大至遣使者迎夫人忘持符夫人曰王與宮人約召必以符今使者不持符妾不敢行於是使者返取符還臺已壞夫人沉水而死

解珮

韓詩外傳昔鄭交甫遊於江漢過漢臯遇二女妖服珮而珠如荆雞郊交甫與言曰願請子之珮二女解珮與交甫懷之去十步探懷中則亡矣回顧二女亦不見相傳沔陽州城西四十里瀕漢江范漑市即交甫遇二女處或曰二女即湘妃

吐貝

春秋暹斗樞璠先得則江吐大貝

泣珠

吳都賦泉客慷慨而泣珠

水出岷山

嶽音來 山海經岷山東北百三十里為岷山江水出焉又東北五

十里為岷山。江水出焉。東流注於大江。

水流潯陽

郭璞江賦。分二源於岷嶽。流九派於潯陽。

學字

四川保寧府有巴江。源出大巴山。至巴縣東南。分為三流。而中央橫貫。勢若巴字。流二十里。合清水江。至合州。與嘉陵江合。又名字江。唐李遠詩。杜宇呼名語。巴江學字流。

投書

蕭方等三十國春秋。光祿勳殷羨之字洪喬。為豫章太守。將行。都下貴游。因寄書百餘函。羨之行。至石頭板橋。投書於江。曰。沉者自沉。浮者自浮。殷洪喬不能為人作致書郵。

過采石

五侯鯖錄。石白過采石江。酒狂。入水捉月而死。

使高麗

宋呂惠公端使高麗。渡江遇風濤。檣折舟人大恐。公怡然讀書。若在齋閣時。

扣舷而唱

隱逸傳。晉賈充渡江。謂夏統曰。能作卿土地間曲乎。統曰。國人痛伍子胥忠烈。為小海唱。於是以足扣舷。引聲清激。風起。晝瞑。眾皆恐懼。充今妓女盛服金翠。繞其舷。三匝。統若無聞。充曰。此吳兒木人石心也。

扣舷而還

唐袁天綱字客師嘗渡江扣舟而還或問故曰船中人鼻下氣皆黑不可以濟俄有一男子跛而負就舟客師曰貴人在吾可以濟矣江中風起幾覆得免跛男子乃妻師德也。

### 耒陽漂水

小說杜甫客耒陽一日過江舟中飲醉是夕江水暴漲南為水以漂泛其屍不知落於何處玄宗思子美詔求之聶令乃積空土於江上曰子美為白酒牛炙脹飽而歿元禎作甫墓志謂甫扁舟下荆楚竟以寓卒旅殞岳陽其後遷祔偃師又韓退之題子美墓曰今春偶客耒陽路悽慘來尋江上墓招手借問牧牛兒牧兒指我祠堂處一堆空土

烟蕪裏空使詩人悲嘆起怨聲千古寄西風寒骨一夜沉秋水當時處處多白酒牛炙如今家家有飲酒食肉皆如此何故常人無飽死捉月走入千尺波忠諫便沉汨羅底固知天意有所存三賢所歸同一水過客留詩千百人千古醜聲竟誰洗明時好古嫉惡人應以我意知終始按小說所載人皆辨其誣觀韓詩又似真有此事矣耒陽今隸衡州府

### 白口阻風

白居易白口阻風詩洪濤駭浪塞江津處處遭迴事事屯世上方為失途客江頭又作阻風人

### 陶侃投棋

遼音體

晉陶侃都督荊州。叅佐或以戲廢事者。乃取其蒲博棊局之具。悉投於江。

### 榮老獻扇

冷齋夜話。王榮老嘗宦於觀州。欲渡觀江。七日風作不得。濟父老曰。公篋中必蓄奇物。此江神極靈。當獻之得濟。榮老有玉麈尾。卽以獻之。風如故。又以端硯獻之。風愈作。又以宣包虎帳獻之。皆不驗。夜臥念曰。有黃魯直草書扇頭題。韋應物詩曰。獨憐幽草澗邊生。上有黃鸝深樹鳴。春潮帶雨晚來急。野渡無人舟自橫。公卽取視之。倘恍之際曰。我猶不識鬼神識之乎。持以獻之。香火未收。天水相照。如兩鏡展對。南風徐來。一帆而濟。

### 清白

清白江在城都新繁縣北。宋趙抃過此曰。吾志如此。江清白。雖萬類混淆其中。不少濁也。因名。

### 混同

混同江在遼東。源出長白山。北流經五國城。又北合松花江。東注於海。

### 色如鴨頭

唐書東夷列傳有馬訾水。出靺鞨之白山。色若鴨頭。故名鴨綠江。西南流至安市。入海。唐太宗征高麗。耀兵於鴨綠水。卽此。

### 源出龍鼻

四川保寧府有清漪江。源出落叢山。至龍鼻山。合六溪水。至彰明縣。會於涪江。

青龍

青龍江。在松江府城北。上接松江。下通滬瀆。吳孫權造青龍戰艦於此。故名。又吳江縣東南有白蜺江。嘉定縣西南有白鶴江。

白馬

白馬江。在成都崇慶州東北。源自晉源廢縣。東入新津縣界。

堯咨神護

翰府名談。宋陳堯咨泊舟三山磯。有老叟曰。來日午後。有

大風舟行必覆。宜慎之。來日天晴。萬里無片雲。舟人請解纜。公曰。更待之。同行舟皆離岸。公托以他事。未行日午。俄有黑雲起於天末。大風暴至。怒濤若山。舟多沉溺。公驚嘆。又見前叟曰。其實非人。乃江之遊奕將也。以公他日當作宰相。固當奉告。公曰。何以報德。叟曰。貴人所至。龍神理當衛護。願得金光明經一部足矣。公許之。至京。以金光明經三部。遣人詣三山磯投之。復夢前叟曰。本期得一。公賜以三當令。公連陞數秩。再拜而去。

蘇頌孝感

宋蘇丞相頌。知婺州。沂桐江水暴迅。舟橫欲覆。魏國太夫人。在舟中。幾溺矣。公哀號赴水救之。舟忽自正。太夫人甫

出及岸舟乃覆衆以為誠孝所感。

舟中私語

唐張柬之代楊元琰為荊州共乘船江中私語外家革命元琰悲涕慷慨志在王室後柬之執政引琰為羽林將軍謂曰江上之言君毋忘之。

舟中危坐

程伊川敗涪州渡漢江中流船幾覆舟中人皆號哭伊川獨正襟危坐如常已而及岸同舟有父老問曰當船危時君獨無怖色何也伊川曰心存誠敬耳。

色若黛玉

嘉陵江源出陝西鳳縣嘉陵谷經廣元昭化等州至四川

保寧府其曰閬水巴水渝水漢水皆此江之異名杜甫詩嘉陵江色何所似石黛碧玉相因依正憐日破浪花出更復春從沙際歸。

水若玻璃

玻璃江在眉州嘉頤山下即岷江也源出岷山瑩若玻璃因名一名墓頤津即唐田令孜沉孟昭圖處。

馬援觀鳶

容江在梧州府容縣南源出北流縣峩石鄉東過藤梧至廣東番禺縣入海漢馬援征蠻仰觀飛鳶跼跼墮水中即此江。

謝端得螺



螺江在福州府城西北。按搜神記。閩人謝端於江邊得一螺。大如斗。畜之家。端每歸。盤餐必具。因密伺之。乃一姝。甚麗。問之。答曰。我天漢中白素女。天帝遣我為君具飲食。今當別去。留殼與君。端用以盛糧。其米常滿。江以此得名。

### 錦江

成都記。濯錦江。秦丞相張儀所築。蜀人以此水濯錦鮮明。故名錦江。

### 繡江

繡江在梧州府藤縣東南。源出廣東高州府雙威寨。北流經容縣。至此與藤江合。為大江。又桂林府有湘灘二江。其源同出興安縣海陽山。流至五里分為二。南為灘水。又名

桂江。漢討南粵。戈船將軍出零陵。下灘水。即此。流至二百里合癸水。至桂林府城下。合相思江。入梧州界。謂之湘水。

六

里合發水。注於海。合昧。昧。入昧。界。謂之昧水。  
蘇氏。載。謂。黃。河。出。崑。崙。之。墟。積。石。山。下。出。崑。崙。之。墟。積。石。山。下。出。崑。崙。之。墟。積。石。山。下。

山堂肆考地理第二十一卷

○河

說文。河者。下也。隨地下流而通也。河神曰水夷。亦曰無夷。即馮夷也。馮夷以八月上庚日渡河溺死。天帝署為河伯。又博物志。馮夷。潼鄉人。得僊道。化為河伯。

瀆宗

穆天子傳。河與江淮濟為四瀆。河者。四瀆之所宗也。說苑。四瀆何以視諸侯。能蕩滌垢污焉。能道百川於海焉。能出雲雨千里焉。為施甚大。故視諸侯。

水伯

孝經援神契。黃河者水之伯。上應天漢。

導積石

夏書導河積石。至於龍門。南至於華陰。東至於底柱。又東至於孟津。東過洛汭。至於大伾。北過洛水。至於大陸。又北播為九河。同為逆河。入於海。

出崑崙

水經注及山海經注。河源出崑崙之墟。東流潛行地下。至規期山。北流分為兩源。一出葱嶺。一出于闐。其河復合。東注蒲昌海。

包砥柱

水經砥柱山名。河水分流包山而過。山見水中。若柱然。

冒石門

山海經積石之山。下有石門。河水冒以西南。注云。冒猶覆也。

九折

淮南子曰。河水九折注海。而流不絕者。有崑崙之輸也。

八枝

漢世河決金隄。議者欲求九河故迹而穿之。未知其所以。班固曰。自茲距漢。亡其八枝也。

千年一清

拾遺記。丹丘千年一燒。黃河千年一清。聖人之大瑞也。羅隱詩。莫把阿膠向北傾。此中天意固難明。解通銀漢應須。

曲纔出崑崙便不清。高祖誓功衣帶小。僊人占斗客槎輕。  
三千年後知誰在。何必勞君報太平。

千里一曲

河圖。河水出崑崙。千里一曲。九曲入海。

三日而變

易。乾鑿度。天降嘉應。河水先清。三日清變為白。白變為赤。  
赤變為玄。玄變為黃。各三日。

三日不流

穀梁傳。梁山崩壅河。三日不流。晉侯召伯尊。伯尊遇輦者。  
問焉。輦者曰。君親素縞。帥羣臣哭之。既而祠焉。斯流矣。伯  
尊至。君問之。伯尊如其言。而河遂流。

魚躍舟

本紀。武王渡河中流。白魚躍入王舟中。

龍薨水

河圖。黃帝夢兩龍授圖。乃齋詣河洛求之。有大魚泛白圖。  
泝流而上。帝跪而受之。又運斗樞。舜以太尉即位。與三公  
臨觀於河。有黃龍五采。負圖置帝前。薨入水而去。

禹䟽

孟子。禹䟽九河。濬濟漯而注諸海。

穆祭

穆天子西征。獵於澹澤。獲白狐玄貉。以祭河宗。

出圖

薨音帝

禮運。河出馬圖。言龍馬負圖而出也。

為崇

左哀六年。楚昭王有疾。卜河為崇。大夫請祭。王曰。江漢睢漳。楚之望也。河非所獲罪也。

子朝沉珪

穆天子傳。王子朝用成周之寶珪。沉於河。乃自浮出。津人得之。河上陰不佞。以溫人南侵。拘得王者。取其玉。將賣之。則變為石。王定而獻之。與之東訾。注云。王定而獻之。言敬王定位。不佞以珪來獻也。

澹臺毀壁

水經注。昔澹臺子羽。齎千金之璧。渡河。陽侯波起。兩蛟挾

舟。子羽曰。吾可以義求。不可以威劫。操劍斬蛟。蛟死。波休。乃投璧於河。三投輒躍出。乃毀壁而去。示無恠意。左傳。二十四年。晉文公及河。子犯以璧授公子曰。臣之罪甚多。請由此亡。公子曰。所不與舅氏同心者。有如白水。投其璧於河。

抱石沉

韓詩外傳。申徒狄。非世。將自投於河。崔嘉聞而止之。曰。吾聞聖人。仁士之於天地間也。民之父母也。今為濡足之故。不救溺人。可乎。申徒狄曰。不然。桀殺關龍逢。紂殺王子比干。而亡天下。吳殺子胥。陳殺洩冶。而滅其國。故亡國殘家。非無聖智。不用故也。遂抱石而沉於河。君子聞之。曰。庶矣。

如仁歟則吾未之見也

臨流嘆

魏志袁紹渡河祖授臨流而嘆曰上盈其志下矜其功悠  
悠黃河吾其濟乎

麾陽侯而渡

淮南子曰武王伐紂至孟津陽侯波起人馬不相見武王  
左操黃鉞右執白旄瞑目而麾曰余在天下誰敢害余者  
於是波息遂渡

傷鳴犢而還

家語孔子之晉及河聞趙簡子殺竇鳴犢及舜華乃臨河  
而嘆曰美哉洋洋乎丘之不濟此命也子貢趨而進曰敢

問何謂子曰竇鳴犢舜華賢大夫也而殺之丘聞之劍  
殺天則麒麟不至其郊竭澤而漁則蛟龍不處其淵覆巢  
破卵則鳳凰不翔其邑何則君子諱傷其類也遂還

灌百川

莊子曰秋水時至百川灌河涇流之大兩涘涯渚之間不  
辨牛馬漢書成帝時河決潰金隄凡灌四郡河隄使者王  
延世塞以竹落長四丈大九圍盛以小石兩船夾載而下  
之三十六日河隄成改元河平

潤九里

漢紀郭伋為潁川太守光武詔曰賢能太守去帝城不遠  
河潤九里冀京師并蒙其福

河上築宮

史記漢文帝時河決酸棗潰金隄武帝元封中河決瓠子天子臨河沉白馬玉璧令羣臣從官自將軍以下皆負薪填決河取淇園之竹以為捷天子悼功之不成乃作瓠子之歌卒塞瓠子築宮其上名曰宣房宮而道河北行

河畔築堤

隋煬帝自板渚引河達於淮海謂之御河河畔築御堤以植柳

延年開嶺

漢武帝時齊人延年上書請令水工開大河上嶺出之胡中東注之海則關東長無水災北邊不憂匈奴此功一成

萬世大利上壯之

張騫窮源

漢書張騫使大夏窮河源惡覩所謂崑崙者乎

賈讓獻策

漢哀帝時賈讓奏治河三策徙其當水衝之人以避之放河使北入海泛濫暮月自定不勞人力謂之上策若多穿漕渠使人得以溉田謂之中策繕完故隄勞費無已此最下策也

鮑照為頌

宋元嘉中河濟俱清照為河清頌

王景賜書

水經注。漢明帝永平中。議治汴渠。上引樂浪人王景問水形便。因賜景山海經。河渠書。禹貢圖。發卒數十萬。詔景與將作謁者治渠防。起自滎陽。至於乘海口千餘里。景商度地勢。鑿山開澗。隄過衝要。䟽決壅積。十里一門。水更相迴注。無復潰漏之患。明年渠成。詔濱河郡國置河隄員吏。如西京舊制。

### 成公著賦

晉成公綏嘗著大河賦。貫中夏之畿甸兮。經朔狄之遐荒。歷二周之北境兮。流三晉之南鄉。秦自西而啟壤兮。齊據東而畫疆。殷徒涉而永固。衛遷濟而遂強。趙決流而却魏。羸引溝而滅梁。思先哲之攸歎。何水德之難量。

### 秦瑞

史記。秦滅六國。自以為獲水德之瑞。更名河曰德水。

### 魏寶

吳起為魏西河守。武侯浮西河而下。中流顧謂起曰。美哉山河之固。此魏國之寶也。起曰。在德不在險。

### 竹箭流

慎子曰。西河下龍門。其流駛竹箭。駟馬追之不及。

### 桃花水

漢溝洫志。河決而桃花水洋溢。注云。三月水漲。名桃花水。

### 神魚舞河

漢紀宣帝詔。東濟大河。天氣清淨。神魚舞河。



偃鼠飲河

莊子曰。偃鼠飲河。不過滿腹。

○淮

釋名。淮。圍也。圍繞揚州北界。東至海也。

會沂泗

夏書。導淮自桐栢。會於沂泗。東入於海。

出桐栢

山海經。淮水出南陽平氏縣桐栢山。其源初則湧出。復潛流三十里。然後長。駘焉。

貢珠魚

夏書。淮夷貢蠙珠。既魚。注曰。蠙。蚌之別名。

出兵賦

唐第五琦曰。兵賦之所出。以江淮為淵。

禹義

夏書。淮沂其乂。注。淮沂。二水名。徐之川。莫大於淮。淮乂。則自泗而下。凡為川者。可知矣。徐之浸。莫大於沂。沂乂。則自沐而下。凡為浸者。可知矣。乂。治也。

召平

周宣王命召穆公平淮南之夷。詩人美之。作江漢詩。

泗水下注

唐文粹。呂周任泗州大水。汜山。泐桐栢。發洪歎湧。下注淮。洪音勒。泐音洪。歎音噴。發音噴。

汴水入鬪

唐五行志。中和三年。汴水入於淮。水鬪。壞船數艘。

橘化枳

周禮。橘踰淮而為枳。此地氣然也。

雀為蜃

國語。趙簡子嘆曰。雀入淮為蜃。龜鼈莫不變化。唯人不能。悲夫。郭璞遊僊詩。六龍安可頓。運流有代謝。淮海變微禽。吾生獨不化。

舡艦渡淮

唐杜祐為徐州節度使。張建封卒。軍亂。立其子愔。請於朝。帝不許。詔祐節度淮泗。討平之。祐具舡艦。遣將渡淮。

鐵鎖絕淮

唐咸通中。龐勛反。圍城。淮南節度使令狐絢遣牙將李湘屯淮口。與郭本厚合。為所敗。由是援絕。泗州刺史杜愔乃以鐵鎖絕淮流。梯衝乘城。

粵府

焦貢易林。江河淮海。天之粵府。眾利所聚。

都市

易林。江河淮海。天之都市。商人受福。國家富有。

獲渦水神

古嶽瀆經。禹治水。三至桐栢山。獲淮渦水神。名曰無支祁。形猶獼猴。力踰九象。人不可視。乃命庚辰制之。是時木魅

水靈山妖水恠奔號叢統幾以千數庚辰持戟逐去遂鎖龜山之足淮水乃安。

封長源王

五代楊溥二年正月封淮瀆爲長源王。

潛周鼎

楚詞潛周鼎於江淮兮注云言藏九鼎於江淮之中也。

沉魏壁

魚豢魏畧魏文帝黃初六年以舟軍入淮遣使者沉壁於

淮記

韓鈞

水經淮水東經淮陰縣漢韓信嘗釣於此處。

王浮

東漢王粲有浮淮賦從王師以南征兮浮淮水而遐逝。

染指

宋徐仲車詩淮之水淮之水春風吹春風洗青於藍綠染指魚不來鷗不起激激灑灑天盡頭祇見孤帆不見舟殘陽欲落未落處盡是人間古今愁可柰何可柰何莫使騷人問棹歌我曹盡是浩歌客笑聲酒面春風和又馬子才長淮謠長淮之水青如苔行人但覺心眼開。

損神

宋范文正公淮上遇風詩一棹危于葉傍觀欲損神他年在平地無忽險中人。

擷芳弔水

隋徐彥伯淮亭吟。擷瑤芳兮弔楚水。弄琪樹兮歌越岑。

沽酒聽歌

宋唐子方介。謫官渡淮。遇風舟欲覆。作詩。聖宋非狂楚。清淮異汨羅。平生仗忠信。今日任風波。舟楫顛危甚。魚龍出沒多。斜陽幸無事。沽酒聽漁歌。

○濟

釋名。濟者。濟也。言源出河北。濟河而南也。山海經。濟水出河東郡垣曲縣王屋山。初名沆水。東出温縣西北。始名濟水。禹貢所謂導沆水東流為濟。入於河。溢為滎。是也。注云。泉源為沆。流去為濟。

沈音交

達河

夏書。浮於濟。潔達於河。注云。舟行水曰浮。交之貢賦。浮濟。浮潔。達於河也。帝都冀州。三面距河。達河則達帝都矣。

注海

淮南子曰。江出岷山。河出崑崙。淮出桐柏。濟出王屋。潁出少室。漢出嶓冢。分流外馳。注於東海。所行則異。所歸則一。

吳溝

趙擘吳越。春秋。吳王夫差。與兵伐齊。掘為深溝。通於齊魯之間。北屬之濟。

齊阻

戰國策。張儀說齊王曰。齊據濟。足以為阻。

通百川

見河瀆宗。

紀一方

通典祭大濟文。播通四氣。作紀一方。

關水

戴延之西征紀。濟水自大坯入河。與河水關而東流。

截流

孔安國注。濟水入河。並流數千里而截河。又並河數里。溢

為榮澤。

馮征

馮衍明志賦。流山岳而周覽。狗碣石與洞庭。浮江河而入

海。沂淮濟而上征。

表汎

袁宏北征賦。背梁山。截汶波。汎清濟。傍祝阿。

獨尊

唐太宗問許敬宗曰。天下洪流巨谷。不載祀典。濟甚細。而在四瀆何也。對曰。瀆之為言獨也。不因餘水。獨能赴海者也。濟潛流屢絕。狀雖微細。獨而尊也。帝曰善。

同靈

唐李甘濟為瀆問。今盡濟水之力。載數石之舟。廣不能橫。深不能浮。而曰與河同靈等秩。吾不知先王班祀之意何如也。

宜麥

淮南子曰。濟水通和。宜麥。

沒蒿

杜甫苦雨詩。濟上沒蓬蒿。

○漢

漢水源出隴西郡嶓冢山。由漢中府。流經鄖縣。及均州光化縣。至襄陽府城北。又東南宜城縣。抵安陸州。至大別山入江。其水因地而名。曰漾。曰沔。曰漢。曰滄浪。總名之為漢。漢水多生瘻。又生粗脛。其樹木亦多瘻。大抵水土使然。按說先儒皆疑漢沔為一。今考二水源流不同。漢水。即禹貢嶓冢導漾。

東流為漢是也。沔水。即書疏沔水下尾。與漢合流。乃入江是也。

朝海

夏書。江漢朝宗於海。

闔江

水經。自沔與江合流。東過彭蠡澤。注云。漢與江闔。轉東成澤。

膠舟

周昭王南征。至漢。舟人膠其舟。王遂溺歿。

亡劍

水經。襄陽故城北。枕沔水。昔張公遇害。亡劍於此。

楚望

見河為崇。

荆川

周禮正南曰荆州其川江漢其浸潁湛。

沉玉

左定三年蔡昭侯為兩佩與兩裘以如楚獻一佩一裘於昭王昭王服之以祭侯蔡亦服其一子常欲之不與三年止之後蔡侯歸及漢執王而沉曰余所有濟漢而南者有如大川蔡侯如晉以其子元與其大夫之子為質而請伐楚

含珠

盛弘之荆州記荆蘊玉以潤其區漢含珠而清其域張衡南都賦耕父揚光於清冷之水游女弄珠於漢臯之曲

對月谷

水經漢水右對月谷山。

配天漢

蔡邕漢津賦配名位於天漢兮披厚土而載形發源自乎蟠塚兮引瀆灑而東征

築堤障害

唐會昌中漢水害襄陽拜盧鈞為山南東道節度更築堤六十里以障漢鈞字子和為堤遏湍

唐張柬之刺襄州。會漢水漲。齧城郭。柬之因壘為隄。以遏  
湍怒。

六師俱喪

周昭王十九年。天大暘。雉兔皆震。喪六師於漢。三十六年。  
伐楚涉漢。遇大兇。

七軍皆沒

蜀關羽攻樊。時漢水溢。于禁等七軍皆沒。

善夷責神

唐文粹。李善夷過漢水。見波濤而責之。以辭曰。漢之廣兮。  
風波四起。雖有風波。不如蹄泔之水。蹄泔之水。不為下國。  
而傾天子。漢之深兮。其深莫量。雖曰莫量。不如行潦之汪。

魴音房

行潦之汪。不為下國。而溺君王。漢之美者曰魴。吾雖饑。不  
食其魴。恐汚吾之饑腸。

交甫遇女

見江。

潛壘

蜀少府王謀等。上言。前襄陽男子張素。王休獻。王爾壘。潛  
漢水。其光徹天。

出鐘

宋書。漢中固城縣。漢水岬際。有異聲如雷。俄頃岬崩。有銅  
鐘十二。出自潛壤。體制既精。扣之清亮。

沉碑紀功



水經沔水東經萬山。山下有潭。昔晉杜預南征紀功勒為二碑。一立萬山上。一沉萬山下潭中。曰千載之下何知深谷不為陵乎。萬山在襄陽府西十里。舊與南郡鄧縣分界。唐鮑溶詩。襄陽太守沉碑意。身後身。前幾年事。漢江千古未為陵。水底魚龍應識字。

揮劍除害

荆州記沔水隈潭極深。先有蛟為害。鄧遐為襄陽太守。拔劍入水。蛟繞其足。遐自揮劍截蛟數段。流血。水丹。蛟患遂息。

○洛

春秋說題辭。洛之為言。纏也。言水纏繞光耀也。魚

豢略。初漢為火行。火忌水。故洛字去水而加佳。魏為土行。土水之母。水得土而流。土得水而柔。故雒字去佳而加水。易乾鑿度。盛德之應。洛水先溫。九日乃寒。五日變為五色。玄黃。

出冢嶺

夏書導洛自熊耳。東北會於澗瀍。又東會於伊。又東北入於河。注云熊耳。盧氏之熊耳也。洛水出冢嶺山。禹只自熊耳導之耳。

出獵山

淮南子曰。洛水出獵山。

鳳歌

沈約宋書黃帝齋於中宮坐於玄扈洛水之上有鳳凰集  
不食生蟲不履生草其雄自歌其雌自舞銜圖置帝前圖  
以黃金為匣

犬吠

李白贈武十七詩秋犬吠清洛天津成塞垣。

龍見

易乾卦帝王始興河洛龍見。

魚流

帝王世紀黃帝時大霧三日帝遊於洛水之上見大魚因  
殺五牲以醮之天乃甚雨七日七夜魚流而得圖書今河  
圖視萌篇是也

稷讀曰

赤光起

尚書中候堯率羣臣東沉璧於洛退至於下稷赤光起靈  
龜負書出亦文成字

青雲浮

尚書中候武王觀於河沉璧禮畢且退至於日昧熒光墜  
河青雲浮洛赤龍臨壇銜玄甲之圖吐之而去

沉璧

帝王世紀湯時有神牽白狼銜鈎入殷朝者乃東觀沉璧  
於洛獲黃魚黑玉之瑞於是始受命稱王

吞珠

帝王世紀漢高祖母昭靈后名含始遊於洛池有玉雞啣

珠刻曰吞此者王合始吞之而生高祖。

青鯉

河圖黃帝遊洛水見鯉魚長三丈身青無鱗赤文成字。

玄龜

沈約宋書玄龜洛書者天符也王者德至川泉則洛出龜書。

周公卜

周書我乃卜澗水東。灋水西惟洛食。我又卜灋水東亦惟洛食。

子晉遊

王子晉好吹笙作鳳鳴常遊伊洛遂得僊。

三川震

史記周幽王二年西周三川皆震伯陽甫曰昔伊洛竭而夏亡河竭而商亡今周德若二代之季矣山崩川竭亡之徵也徐廣曰三川涇渭洛也。

二水關

國語周靈王二十二年穀洛二水關將毀王宮王欲壅之太子晉曰晉聞古之長民者不墮山不崇藪不防川不實澤是以民生有財用而必有所葬王不聽卒壅之及景王多寵人亂於是始生注云關者兩水相格似關也毀王宮者洛在王城之南穀在五城之北靈王時穀水盡出於王城之西南流合於洛水毀王城西南將及王宮也。

流王

山海經秦冑之山。洛水出焉。東流注於河。其中有藻玉。

墜鍾

康音官孫嵩宋書。高祖平關洛。致鐘簋舊器南還。一大鐘墜洛水。

居浹作賦

潘岳閑居賦。退而閑居。于洛之浹。

巡堤咏詩

唐劉禹錫嘉話。高宗時。天下無事。上官儀獨持國柄。常凌晨赴朝。巡洛水堤。步月緩轡。詠詩音韻清亮。望之若僊。其詩曰。脉脉廣川流。驅馬歷長洲。鵲飛山有曉。蟬噪野風秋。適之修防。

唐玄宗患洛水歲暴。耗徭力。詔李適之以禁錢作三大防。曰上陽曰積翠。曰月陂。自是水不能為患。

昭德繕橋

初洛有二橋。司農卿韋弘機徙其一。置長夏門。人皆利之。然洛水歲涇。齧之繕者告勞。李叟德始累石代柱。銳其前。使殺暴濤水不能怒。自是無患。

宜禾

淮南子曰。洛水輕利。宜禾。

有石

畧音豫。述征記。洛水底有畧石。故上無水。

○渭

春秋說題辭渭之爲言布也。渭渭流行貌。雜兵志。東海出氣如鼈。渭水出氣如蜃。

導同穴

夏書。道渭自鳥鼠同穴。東會於澧。又東會於涇。又東過漆沮。入於河。河圖爲鼠同穴。山地之幹也。渭水出其中。

浸雍州

周禮。雍州其浸曰渭洛。

迎太姒

詩大雅。大邦有子。倪天之妹。文定厥祥。親迎於渭。

遇太公

史記。太公望者。東海上人。以漁釣。好周西伯。西伯將獵。卜

曰。所獲非龍非麇。非熊非羆。霸王之輔。於是西伯獵。果遇太公於渭水之陽。與語大悅。載與俱歸。

水貫天漢

三輔記。秦作離宮於渭南。北渭水貫都。以象天漢。橫橋南渡。以法牽牛。橫橋即中渭橋也。在西安府西北。三輔舊事。漢都渭南。開北闕以臨渭。

祀比大川

沈約宋書。秦漢都西京。涇渭雖不在祀典。以其近咸陽。故皆得比大川之祀。

出周鼎

史記。漢文帝十五年。趙人新垣平以望氣見上。說上立渭

陽五帝廟曰周鼎亡在泗水中。今河溢通泗。臣望東北汾陰。直有金寶氣。意周鼎其出乎。兆見不迎。則不至。於是上使治廟汾陰。祀以出鼎。

得燕壘

王景暉南燕書。姚秦皇初三年。歲在丁酉。於長安渭濱得赤壘。上有文字曰天命燕德。

投錢

三輔決錄。安陵清者。項仲山飲馬渭水。每投二錢。

出椀

酉陽雜俎。景龍寺前街中。舊有巨井。俗呼為八角井。元和初。有公主夏中過之。令從婢以銀椀就井承水。候墜椀。

於井。經月餘。此椀出於渭河。

漢武造橋

東渭橋在西安府東北。漢高祖造以通櫟陽之道。西渭橋在西安府西北。故長安城西。漢武帝造跨渭水以通茂陵。以其對便門。故亦名便橋。唐時名咸陽橋。

符健設壇

裴景仁符書。符健至長安。賈玄等上尊號。依舊儀。立百官。設壇城南渭水之陽。

趙屯

漢趙充國屯田于渭濱。

馮耕

馮衍賦序。馮子耕於驪山之阿。渭水之陰。廢弔問之禮。絕游宦之路。眇然有超物之心。無偶俗之志。

乘輿馬驚

漢張釋之為廷尉。文帝出中渭橋。有一人從橋下走出。乘輿馬驚。使騎捕屬廷尉。釋之奏此人犯蹕。當罰金。

帝閑馬化

桀宗元龍馬贊。明皇在位。靈昌郡得異馬於河。其狀龍鱗虺尾。拳毛環目。肉髯。居帝閑二十一年。遇祿山亂。帝西幸至咸陽。西入渭水。化為龍。游泳而去。不知所終。

渭橋女星

陳壽益部耆舊傳。漢武時。張寬為侍中。從祀甘泉。至渭橋。有女子浴於渭水。乳長七尺。上恠問之。女曰。後第七車。中知我所來。時寬在第七車。對曰。天星主祭祀者。齋戒不潔。則女人星見。一統志所載。女子浴於涇河。

渭橋道術

葛洪神僊傳。附馬都尉北海巫炎。字子都。漢武帝出巡。子都見於渭橋。上見炎頭上鬱鬱有紫氣。高丈餘。召東方朔使相此君有何道術。對曰。此君有陰道之術。

龍飲

辛氏三秦記。龍首山長六十里。頭入渭水。尾達樊川。高二十丈。昔有黑龍從南山出。飲渭水。其行道因成土山。名龍首。

雞翎

裴景仁符書。符健皇始四年冬。山雞來入人家。栖宿養子而去。又羣聚傍渭水游翔。與家雞無異。

觀蛙

唐志神龍中渭水有蛙。大如鼎。里人聚觀數月而失。

抱馬

安祿山反。王師敗績。僕固懷恩至渭水。無舟。抱馬鬣以逸。

水赤

漢書昔三代居三河。而河洛出圖書。秦居渭陽。而渭水數赤。瑞異應德之效也。

性清

後周宇文道至渭源。詩曰。合流應不雜。方知性本清。

○涇

涇音產  
齋音駁

關中記涇與渭洛為關中三川。與渭灞澇潯瀆豐

瀉為關中八水。辛氏三秦記及山海經注。涇水出

安定郡涇陽縣西。開頭山東南。經新平扶風。至京

兆高陵縣而入渭。與渭水合流。三百里。清濁不相

雜。詩國風涇以渭濁。

引水為渠

漢武時。趙中大夫白公奏穿渠引涇水。首起谷口。尾入櫟陽。注渭中。二百里。溉田四千五百頃。名曰渠。人得其饒。

卜水為崇

丹聲堅  
二音



山堂集考 卷二十一 二十三  
史記秦二世夢白虎嚙其左驂馬殺之心不樂恠問占夢  
卜曰涇水為祟二世乃齋於望夷宮祀之沉四白馬於涇  
水。

毒置上流

左襄十四年晉侯伐秦濟涇而次秦人毒上流師人多歎  
祀比大川

見渭

富流

李庾西都賦其地勢也帶涇渭之富流

穢跡

柳子愚溪序秦有水倚汨泥淖撓泥沙礫乃合清渭自彰

穢跡故名曰濁涇

山崩水涸

淮南子曰。碯山崩而薄洛之水涸。高誘注。碯山在雍。薄洛  
之水。涇水也。蓋涇水出薄洛山故耳。

岸積流壅

漢武帝河平四年。長陵臨涇。岸積壅涇流。

請開支渠

唐黎幹。戎州人。大曆十三年。涇水擁隔。請開鄭白支河。復  
秦漢故道。以溉田。戍廢碾磴八十餘所。

命刮朽壤

唐王維作張公德政碑。惟涇失防。比歲多決。近縣疲於奔

山堂肆考 卷二十一  
役他山苦於度材。公命刮朽壤填巨石。民受其利。

胡盧河

胡盧河本名蔚茹河。源出平涼府鎮原縣西南顏沙山下。流入涇河。

滕脂川

川在平涼府華縣西北一百里。東流入涇河。

山前水曰澗  
澗水曰澗  
澗水曰澗

山堂肆考地理第二十二卷

○湖

湖都也。流瀆四面。所隈都也。

具區

濁音黑

太湖在蘇州府城南五十里。禹貢謂之震澤。周公爾雅謂之具區。史記國語謂之五湖。其地跨蘇常嘉湖四府界。一名笠澤。一名洞庭。張勃吳錄五湖者太湖之別名。以其周行五百餘里。故名五湖。或又以太湖射陽湖上湖洮湖。濁湖為五湖。然按國語吳越戰於五湖。直在笠澤一湖中耳。則知或說非也。十道記太湖發源湖州長興縣界。入常州晉陵界。又入無錫界。晉陵之東。入蘇州吳縣界。廣三萬六

山堂集考  
千頃下有地道。潛通龍威夫人之所居。

匯音位

匯澤

荊州記。宮亭湖。即彭蠡澤。謂之彭蠡湖。一名匯澤。一名鄱陽。一名揚瀾。

揚浸

周禮。揚州。其浸曰五湖。

荆數

劉澄之荊州記。華容縣東南。有雲夢澤。一名巴丘湖。荆之藪也。

分風

盛弘之荊州記。宮亭湖廟神甚靈。塗旅經過。無不祈禱。能

使湖中分風而帆。宋秦觀宿湖邊。惜竹軒。夢神女贈詩云。不知水宿分風浦。何似秋眠惜竹軒。聞道文章妙天下。廬山對面可無言。

起雨

冊音偏  
南康仁空山下有平湖。湖中扁底浮出。每動搖便起風雨。

軒轅鑿

軒轅遊蜀。見水多決之下流。江湖皆溢。乃鑿湖注水。今洞庭其一也。

始皇憩

錢塘記。去邑十里有詔息湖。父老相傳。始皇巡幸。經此暫息。因以名湖。

卽官

唐李白卽官湖序。故人尚書卽張謂。出使夏口。沔州牧杜公。漢陽宰王公。觴于江城之南湖。方夜水月如練。清光可掇。張公殊有勝槩。四望超然。乃顧白曰。此湖古來賢豪遊者非一。而枉踐佳景。寂寞無聞。夫子可為我標之。嘉名以傳不朽。白因舉酒酹水。號曰卽官湖。亦猶鄭圃之有僕射陂也。

太傅

常熟縣有太傅湖。太傅卽謝安也。

龍目

劉植京口記。秦始皇東觀龍目湖。親見形勢曰。此有天子

氣。使赭衣之徒鑿湖中長岡使斷。因改名丹徒。

馬骨

滙音產 荆州有大滙馬骨等湖。夏水來則渺濔若海。及冬水涸。則平林曠澤。四眺煙日。

鷺飛

揚州記。新城縣東有一山。山上有湖。湖中有一白鷺。時或飛來。不可常見。

魚下

鄭緝之水嘉記。懷化縣有蔣公湖。父老相傳云。先代有祭祀祈請者。湖輒下大魚與之。

五渚

戰國策秦與荆戰大破之取洞庭五渚

三山

劉澄之豫州記城父縣有巢湖周圍五里湖中有三山湖南有四鼎

銅船

劉欣期交州記交州有一湖百姓樵捕者見銅船出水上又有水牛在湖中

石函

吳志孫皓時吳都臨平湖邊得石函中有小石青白色上刻作皇帝字因改元為天璽大赦

淪雞

酉陽雜俎句容縣吳瀆塘有半湯湖湖水半冷半熱可以淪雞魚誤入輒死

飲馬

五代史唐莊宗滅梁馬殷遣子希範脩貢京師莊宗問洞庭湖廣狹希範對曰車駕南臨纔堪飲馬耳上嘉之

黃蓬

沔陽州南黃蓬山下有黃蓬湖納茅埠口許家池諸水及連大舍白螺上洪等湖趨復車達新灘入江

青草

荆陵記巴陵有青草湖周圍數百里日月出沒其中以湖南有青草山故名一名巴丘湖北連洞庭南接瀟湘東納

汨羅之水每夏秋水泛與洞庭為一水涸則此湖先乾青草生焉。杜甫詩洞庭猶自在。青草續為名。又云鮫室圍青草。龍堆擁白沙。

范蠡開瀆

長洲縣北境有蠡湖。一名漕湖。范蠡伐吳開蠡瀆以通此湖。故名。又句踐滅吳。范蠡乘扁舟遊五湖。終不返。

張闓立塘

丹徒縣東南有新豐湖。晉大興初。晉陵內史張闓以所部四縣。天旱失田。乃立曲阿新豐塘。灌田八百餘頃。因名新豐湖。

乘鯉

八閩通志。僊游縣東興泰里有九鯉湖。漢何氏兄弟九人。嘗止於南山。而煉丹於湖側。及丹成各乘一鯉仙去。故名湖曰九鯉。山曰九仙。其仙甚靈。閩人祈夢無不神驗。

射蛟

徽州府西南有黃墩湖。昔有陳靈洗者。夜夢人告曰。吾數為呂湖蛟所困。明日幸見助。靈洗曰。何以為識。曰。白練者我也。及旦往視之。見二牛相觸。有白者困。靈洗射黑牛。必視之。乃蛟也。按靈洗。休寧人。侯景亂。保歙。黟以拒景。梁武帝授以本郡。呂湖即黃墩湖。

山川如畫

建業有玄武湖。一名後湖。一名北湖。一名蔣陵湖。宋元嘉

山經考 卷二十二 五  
中有黑龍見。改今名。立三神山于湖祀之。南唐近事。湖周圍數十里。幕府雞籠二山環其西南。蔣山諸峰列其左。山川掩映如畫。六朝舊跡多出其間。一日諸老坐朝堂。語馮謐舉唐賜賀知章鏡湖事曰。非敢望此。若得後湖。一暢平生也。徐鉉曰。主上尊賢下士。常若不及。豈惜一湖所乏者。知章耳。馮大慙。

### 燕雀助封

金陵城東有燕雀湖。相傳今走馬橋東水平湖是也。或曰白蕩湖即其地。窮神祕苑。梁昭明太子有一琉璃盃。紫玉盃。既慶置梓宮。後更葬。為閹人携入大航。有燕雀數萬擊之。武帝聞而異焉。以賜大孫。封墳之際。復有燕雀數萬銜土助封。墳側有湖。後人因名燕雀湖。

### 百石

沔陽州西有百石湖。中為長隄。為驛道。亘十餘里。舊植柳人馬往來其上。亦一景也。

### 三城

三城湖在江寧縣西南。湖中舊有三少城。故名。沔陽州西有三陽湖。東曰朝陽。南曰南陽。北曰水陽。

### 長蕩

金壇縣東南有長蕩湖。一名洮湖。

### 短汀

短汀湖在沔陽州東。受張家壩港。接魯陽潭。諸水經麻汀。

入白湖。

芍陂

劉澄之豫州記陳縣北有芍陂湖魏將王陵與吳張休交戰處。

高臺

高臺湖在沔陽州景陵縣東達回河口入漢。

塔影

塔影湖在泗州西北日照龜山寺塔影落於湖故名。

倉基

倉基湖在桃源縣治南東流達河入淮千里

也。千里湖在溧陽東南陸機云千里黃蘗末下鹽政指此湖也。

五部

五部湖在無錫縣東北東西二十里南北十里源濁流清二派分流

高淳縣西南有丹陽湖中流與當塗縣分界東連石臼固城二湖其源有三一出徽州黟縣為舒泉一出廣德州白石山為桐水一出溧水縣東廬山為吳漕水三源匯合其流分為二派一西出蕪湖一北出當塗姑孰溪入江。

三縣分界

射陽湖在淮安山陽縣東南漢廣陵王胥有罪其相勝之



山陽縣志卷之二十一  
奏奪王射陂。即此。濶三千丈許。周圍三百里。山陽海州寶應三縣分湖為界。

雉城

崑山縣西北有雉城湖。

馬鞍

鹽城縣北有馬鞍湖。入侍其汊。達射陽湖。

日月

進賢縣有日月湖。水涸則分而為二。漲則合而為一。中有石人灘。古諺。日月湖明。良將出。石人灘合。狀元生。

風波

沔陽州景陵縣東北有風波湖。

知章詔賜

唐賀知章。字季真。越州人。為秘書監。開元中。遷禮部侍郎。兼集賢學士。晚年號四明狂客。天寶初。請為道士。還鄉里。就求周宮湖數頃。為放生池。詔賜鏡湖剡溪一曲。鏡湖在今紹興府城西南。李白詩。鑑湖三百里。菡萏發荷花。五月西施採。人看溢若耶。宋陸務觀有思故山鏡湖詩。

莘老家居

高郵城西有甓社湖。宋崔伯易有賦。其叙云。孫莘老家於湖陰。夜讀書。覺窻明如晝。循湖求之。見一大珠。其光屬天。是年莘老登科。黃庭堅詩。甓社湖中有明月。淮南草木借光輝。

山堂肆考  
養武士

太子湖一名西池。在金陵城北。吳宣明太子所創。晉明帝為太子時脩西池。多養武士。

溺宮人

落星湖在彭蠡湖西北。湖中有小山。相傳星墜水所化。故湖名落星。陳王僧辯破侯景於落星灣。及宋孟太后過落星湖。宮人舟覆溺死者十數。惟太后舟無虞。皆此處也。

白馬

白馬湖在新安。一在寶應。蜀有白羊湖。沔陽州有白鷺湖。金壇有銅馬湖。

白鹿

白鹿湖在邳州治南。由小河及泗。

縣淪

趙擘吳越春秋海鹽縣淪為招湖。徙居武康鄉。故越地。

城陷

青瑣高議。今巢湖乃古巢縣。一日江漲。港有巨魚。人取以貨市。合縣食之。有一老姥獨不食。遇老叟曰。此吾子也。汝獨不食。吾厚報汝。若東門石龜目赤。城當陷。姥日往觀。有稚子訝之。姥以實告。稚子欺之。以朱傅龜目。姥見。急出城。有青衣童子曰。吾龍之子也。乃引姥登山而免。

龍升

秦州記武都郡前有湖。晉義熙初。有白龍從湖中升天。

牛見

蘇東坡連守潁杭二州皆有西湖其初得潁也有潁人在坐云內翰只消遊湖中便可了郡事及守杭秦觀有詩云十里薰風菡萏初我公所至有西湖却將公事湖中了見說官閑事也無按杭州西湖故明聖湖也周圍三十里三面環山谿谷縷注下有淵泉百道潴而為湖漢時金牛見湖中人言明聖之瑞遂稱明聖湖以其介於錢塘也又稱錢塘湖以其委輸於下湖也又稱上湖以其負郭而西也又稱西湖東坡後謫惠州亦有西湖其詩云水光潑灩晴方好山色空濛雨亦奇欲把西湖比西子淡粧濃抹兩相宜林和靖詩混元神巧本無形匠出西湖作畫屏春水淨

於僧眼碧曉山濃似佛頭青藥爐粉堵搖魚影蘭柱煙叢閣鷺翎往往鳴榔與橫笛斜風細雨不堪聽

○水

淮南子曰積陰之氣為水水神曰天吳亦曰馮夷波神曰陽侯濤神曰靈胥

流濕

易乾卦水流濕火就燥

樂饑

詩陳風泌之洋洋可以樂饑注云可以玩樂而忘饑也

懷山襄陵

夏書湯湯洪水方割蕩蕩懷山襄陵注云懷包其四面也

山堂集卷二十一  
襄駕出其上也

浮天載地

玄中記。天下之多者水焉。浮天載地。高下無不至。萬物無不潤。抱朴子記黃帝曰。天在地外。水在天外。浮天而載地者水也。

上善

老子曰。上善若水。水善利萬物而不爭。處衆人之所惡。故幾於道。

乘哀

淮南子曰。水之性乘勢而行。乘哀而流。注云。哀。下也。

智者樂

論語。智者樂水。

君子觀

荀子曰。孔子觀於東流之水。子貢曰。君子所以見大水必觀焉。何也。孔子曰。夫水至柔而無為也。似德。其流也卑下。倨拘必循其理。似義。其洗洗乎不涸盡。似道。其赴百仞之谷不懼。似勇。主量必平。似法。盈不求概。似正。淖約微達。似察。以出以入。以就鮮潔。似善。其萬折也必東。似志。

涇楮忽  
汨三音

習坎

易坎卦。水洊至。習坎。君子以常德行。習教事。

盈科

孟子曰。流水之為物也。不盈科不行。

觀呂梁

莊子曰。孔子觀呂梁。懸水三十仞。流沫四十里。鼃鼃魚鱉不能游。見一丈夫游之。與沒俱入。與汨俱出。

遊濠梁

莊子與惠子遊於濠梁。莊子曰。儵魚出遊。從容是魚樂也。惠子曰。子非魚。安知魚之樂也。莊子曰。子非我。安知我不知魚之樂也。

民狎

左昭二十一年。子產曰。火猛烈。民望而畏之。故鮮死焉。水懦弱。民狎而玩之。則多歿焉。

人輕

淮南子曰。土地各以類生人。清水音小。濁水音大。湍水人輕。遲水人重。

彰五色

禮學記。水無當於五色。五色弗得不彰。

生萬物

淮南子曰。天下之物。莫柔弱於水。上天則為雨露。下地則為潤澤。萬物不得不生。百事不得不成。

吳猛畫扇

吳猛。濮陽人。仕吳為西安令。因家分寧。性至孝。遇至人。下義授以神方。嘗渡江。值風濤。猛以白羽扇畫水而渡。

曇隱供厨

廐音忙

潘決幸  
二音

金陵鍾山之東靈谷寺有八功德水昔梁胡僧曇隱寓錫於此之水時有廐看叟謂曰予山龍也措之無難俄而一沿水沸出宋曾極詩數斛供厨替八珍穿松漱石瑩心神中涵百初煙霞色不染齊梁歌舞塵按八功德水一清二冷三香四柔五甘六淨七不噎八除病也又關內八水一涇二渭三灞四滻五滂六滴七灋八瀉也

宗海

詩小雅沔彼流水朝宗於海

成淵

荀子曰積水成淵蛟龍生焉

高前帝漿

山海經高前之山其上有水甚寒而清帝臺之漿也

亳州聖水

唐李德裕傳亳州浮屠詭言有水可愈疾號曰聖水

汀水獨南

天下水皆東惟汀水獨南南丁位也以水合丁為汀故福建有汀州府蓋取此義又林氏曰衆水皆東而弱水獨西黑水獨南因其性與勢之自然也

閩水皆西

漢張騫言于閩之西水皆西流注西海其東水皆東流注鹽澤元楊廉夫曰佛居大地之陰西域也日必後照地皆西傾水皆西流故言性以空孔子居大地之陽日必先照

地皆東傾。水皆東流。故言性以實。亦地氣有以使之然歟。  
宜禾宜黍

漢書禮淮南子曰。洛水宜禾。渭水宜黍。夔州府東有東瀼水。號東屯。宜瓜疇芋區。西瀼水號西屯。所宜亦同。

出鱖出鮒

陝西漢中府沔縣有度水。水有二源。曰清檢濁檢。清水出鱖魚。濁水出鮒魚。常以二八月取之。

如象如馬

寰宇記灑潁堆。冬來出水二十餘丈。夏水漲半沒。在夔州巫峽口。方輿勝覽在夔州西二百步瞿塘峽口。蜀江之心。土人諺云。灑潁大如象。瞿塘不可上。灑潁大如馬。瞿塘不

可下。峽人以為水候。

如絲如霧

長沙府醴陵縣學前有淥水湧出自地脈。如絲如霧。用白器入水。酌而澄之。其色深綠。可以書字。每出則其年登科者必多。

李冰防患

秦李冰為蜀守。以岷山通江為四瀆之首。水或為患。乃作三石人。以止江水。作三石牛。以壓水怪。分為三十六江。以資灌溉。由是人無水旱之患。號為陸海。蜀人德之。宋子京文翁祠碑。蜀廟食千五百年而不絕者。秦李冰。漢文翁而已。

王商止訛

漢書建始中京師無故相驚言大水至成帝召公卿議大將軍王鳳以為太后與上及後宮可御舟船令吏民上長安城以避水左將軍王商獨曰自古無道之國水猶不冒城郭今聖政和平上下相安何因當有大水一日暴至此必訛言也不宜重驚百姓上乃止有頃長安定問之果如商言。

洗耳

謚音密皇甫謚高士傳許由字武仲堯聞其賢欲致天下而讓焉乃退而遁於中嶽潁水之濱箕山之下堯又召為九州長由不欲聞洗耳於潁濱時有巢父牽犢欲飲之見由洗耳

問其故對曰堯欲召我我惡其聲是故洗耳巢父曰子若處高岍深谷人道不通誰能見子子故浮游欲聞求其名譽汚吾犢口牽犢上流飲之。

染足

筆談漳水界有水號烏脚溪涉者足皆如墨數十里間水皆不可飲飲則病瘴行人皆載水自隨梅龍圖儀官州縣時汧濞至漳州素多病預憂瘴癘為害至烏脚溪使數人肩荷之以物蒙身恐為毒水所沾驚惕過甚睢盱矍鑠忽墮水中至於沒頂乃出之舉體黑如崑崙自謂必死然自此宿病盡除頓覺康健。

灌城

汧濞音奇元肩



戰國策智氏最強滅范中行氏又帥韓魏圍趙襄子於晉陽決晉水灌其城不浸者三板耳。

没湖

淮南子曰歷陽有老嫗嘗行仁義有過之者謂曰此當没為湖視東門有血便走上山勿反顧也自此嫗數往視門門吏問之嫗對如其言吏殺雞以血塗門明日嫗早往視門有血便走上山歷陽遂没為湖。

止淫

淮南子曰往古之時四極廢九州裂水浩瀚而不息於是女媧氏積蘆灰以止淫水。

流恨

杜詩第五橋東流恨水皇陂岸北結愁亭注云第五橋皇陂皆在長安城外乃會別之所也。

出白

仇音莘呂氏春秋有仇氏女子採桑得嬰兒於空桑之中獻之其君命庖人養之察其所以然曰其母在伊水上嘗夢神告之曰白水出而東走母明日視白果出水告其隣東走十里而故邑盡為水身因化為空桑故命其子曰伊尹。

覆籠

續述征記梁鄒城西有籠水相傳齊孝婦誠感神明涌泉發於室內潛以績籠覆之由是無羗汲之勞家人疑之時其出而搜其室試發此籠而泉遂涌流漂居宇故名籠水。

轉宮

東漢宦官張讓趙忠說靈帝鑄天祿蝦蟆吐水於平門外橋東轉水入宮。又作翻車渴鳥。施於橋南。用灑南北郊路。以為可省百姓灑道之費。按天祿即蝦蟆也。伯樂之子按圖索驥。以蝦蟆為馬。即此翻車轉動之器。激水而上者。渴鳥受水之器。如鳥之渴飲。故名渴鳥。

入殿

唐高宗永徽五年。上在萬年宮。夜大雨。水衝入玄武門衛。士皆走。郎將薛仁賢曰。天子有急。敢愛身乎。登門枕大呼。以警宮內。上遽出乘高。俄而大水入寢殿。漂沒三千餘人。

濯錦

見江

漬粉

荊州記。筑陽縣西有粉水。源出房陵縣。取其水為粉。鮮潔異於他水。雍州記。蕭何夫人嘗以此水漬粉。

臭過椒蘭

列子曰。禹治水土。迷之一國。無風雨霧露。不生鳥獸。有山若壺頂。有口若圓環。名曰滋穴。有水湧出。名曰神漢。臭過椒蘭。味過醪醴。

利穿金石

淮南子曰。水之為物。擊之無創。射之不傷。斬之不斷。焚之。不燃。利穿金石。功濟天下。

漢音奮

夫餘沉羽

廣志弱水在夫餘北其水不勝毛羽。柳子厚云。西海之山有水焉。散渙無力。不能負芥。投之則委靡墊沒。及底而後止。

河東化血

崔豹古今注。漢安帝延平中。河東水化為血。元初中。潁川襄城水化為血不流。

方玉圓珠

尸子曰。凡水方折者有玉。圓折者有珠。清水有黃金。龍淵有玉英。

冬凝春泮

淮南子曰。夫水向冬則凝而為冰。向春則泮而為水。

易牙嘗

通仍免  
二音

列子曰。白公問於孔子曰。人可與微言乎。孔子不應。白公曰。若以石投水何如。孔子曰。淄澠之水。易牙嘗而知之。白公曰。人故不可與微言乎。孔子曰。何為不可。唯知言之謂者乎。知言之謂者。不以言言也。注云。白公欲為亂。而不敢顯言。求決於孔子。孔子知其意。故云云。按。淄澠。二水名。淄水在青州府城西。源出泰安州萊蕪縣原山。流達臨淄。至壽光縣入濟水。禹貢維淄其道。即此。澠水。源出青州府臨淄縣西申門之申池。即左傳所謂齊懿公遊於申池是也。申池水。

一支西流為系水。一支北流為澗水。左傳所謂有酒如澗。魯仲連謂田單騁乎淄澗之間。淮南子謂易牙嘗淄澗而別之者。即此易牙。雍人名巫牙。其字也。

德裕辯

中朝故事。唐李德裕作相。有奉使京口者。李令還日。金山下楊子江南冷水。取一壺來。其人舉棹日。醉而忘之。泛舟回至石城下。方憶其言。乃汲一瓶歸京獻之。李公飲後。嘆訝曰。江表水味有異於往歲矣。此水頗似建業石頭城下水。其人謝過不敢隱。

龍吟

摩慶府開建縣東金縷村。唐狀元莫宣卿讀書堂在焉。水

流清響。父老呼為龍吟水。

雞浴

廉州府石康縣東有金雞水。相傳昔有金雞浴於水傍。故名。

請以身填

漢書王尊字子贛。為東郡太守。河水泛溢。浸瓠子金隄。尊投白馬祭水。併効水神河伯。請以身填金隄。因止宿廬居隄上。及水盛隄壞。吏民奔走。尊立不動。而水波稍退。

能以氣禁

抱朴子曰。左慈能以氣禁水。水為之逆流。一二丈。禁水置庭中。露之。即大寒不冰。

流桑

安慶府宿松縣南九江口。有桑落洲。昔江水泛漲。流一桑樹於此洲。因名。晉劉毅與盧循戰於桑落洲。即此。又按洲在大江中。江北則安慶府宿松縣。相距百餘里。江南則江州湖口縣也。

承瓠

博物志。庭州灞水。以金銀鐵器承之。皆漏。唯承以瓠葉則不漏。

文公儲船

東漢書。任文公為治中。時天旱。白刺史曰。五月一日。當有大水。宜預儲船。刺史不聽。百姓有信其言。預為防者。至其

月日中雲起。須臾雨至。晡時水湧起十餘丈。突壞廬舍。所害至數千人。

龍澄獲印

大灋水。在夔州府東。自達縣萬頃池發源。宋洪邁夷堅志。宣和中。龍澄嘗於灋水中獲玉印。印文非世間篆籀。澄見天神立於傍。曰。此印上帝所寶。今守護不謹。遂落於此。神俄不見。澄懼。乃奉印投原處。

流出名山

博物志。八流皆出名山。渭出鳥鼠。漢出蟠冢。洛出熊耳。涇出少室。汝出燕泉。泗出陪尾。沔出月台。沃出泰山。

源出桃林

永嘉郡記桃枝水源出東陽長山縣桃林之下。  
水有四德

尸子曰水有四德沐浴群生通流萬物仁也揚清激濁蕩去滓穢義也柔而難犯弱而難勝勇也導江疏河惡盈流謙智也

水有七種

唐張又新為水說七種其一惠山泉三虎丘井四松江按又新元和中狀元及第

秘省極佳

茶錄唐秘省中有水極佳名秘水

下筭極美

長興縣有筭溪生箭筭南岸曰上筭北岬曰下筭土人取下筭水釀酒味極醇美白樂天詩勞將下筭忘憂物寄與江城愛酒翁

士龍顧影

晉陸士龍常着練經上船於水中顧影大笑落水人亟救之免溺

趙軌比清

隋趙軌為齊州別駕文帝徵入朝父老送者曰別駕在官水火不與百姓交是以不敢以杯酒相送公清如水請酌一杯水奉餞軌受飲之

子瞻符取

東坡曰。余愛玉女河水。破竹為契。使寺僧藏其一。以為往來之信。謂之調水符。其詩云。欺謾久成俗。關市有棄繻。誰知南山下。取水亦置符。古人辯淄澠。皎若鶴與鳧。吾今既謝此。但視符有無。常思汲水人。智出符之餘。多防竟無及。棄置為長吁。

### 鴻漸杓揚

張又新水錄。唐李季卿刺湖州。至維揚。遇陸鴻漸。謂曰。陸君善茶。天下所聞。揚子南冷水。又奇絕。今者二妙。千載一遇。何可輕失。乃命軍士謹信者。挈瓶操舟。深詣南冷。陸潔器以待。俄水至。陸以杓揚水曰。江則江矣。非南冷者。似臨岸水。使者稱不敢給。既而傾諸盆。至半遽止。又以杓揚之。

曰。此南冷者矣。使者蹶然駭曰。其自南冷齋水至岸。舟盪去其半。懼其少。取岸水增之。處士之鑒神鑿也。李大驚。

### 時平乃清

宋博士呂淑水賦。新豐則時平乃清。臨淄則世亂而竭。按唐書。新豐鸚鵡谷水清。世傳。谷水清。天下平。述征記。臨淄牛山下有女水。齊人諺。世治則女水清。世亂則女水竭。故慕容超時。乾涸彌載。及宋武北征。乃激洪流。

### 風起輒動

吳孫權至淦城。自標井地。令人掘之。得故井。銘曰。漢潁陽侯灌嬰所開。井甚深。遇江中風浪起。此井水輒動。

### 黑水

黑水。源出陝西行都司肅州衛城北十五里。又地志云。黑水出張掖縣雞山。

白水

源出肅州衛城西南二十里。下流與紅水黑水合。

紅水

源出肅州衛城東南山谷中。下流與黑水合。

藍水

杜詩。藍水遠從千澗落。

五渡水

韶州圖經。曲江縣脩仁水北有三楓亭。五渡水。齊范雲為始興守。至脩仁水。酌而飲之。賦詩云。三楓何習習。五渡何

悠悠。又陶秀實清異錄。武夷山有石如立壁。巔隱一泉。分七派。山僧顛堅。名為七絃水。

三泖水

三泖水。在松江府城西南。即華亭谷水也。晉陸機對武帝云。三泖冬溫夏涼。而圖經又以泖有上中下之名。舊縣圖以近山涇圓者曰圓泖。近泖橋濶者曰大泖。自泖而上。縈繞百餘里者曰長泖。

○泉

爾雅。水本曰源。源曰泉。正直上出曰檻泉。從上溜下曰下泉。湧出曰瀆泉。側出曰汎泉。所出同。所歸異。曰肥泉。異出同流曰漢泉。

泖音卯



刺山

漢書李廣利為貳師將軍伐大宛還士眾渴甚廣利拔佩刀刺山飛泉湧出

拜井

東漢耿恭字伯宗為戊巳校尉踈勒城傍有澗水匈奴來攻據澗上流絕之士卒不得飲恭於城中穿井十五丈無水乃嘆曰昔貳師將軍拔刀刺山而泉湧乃整衣向井再拜為士卒禱有頃飛泉奔出眾皆稱萬歲因揚水示虜虜以為神遂引去

盤龍

酉陽雜俎元街縣有泉眼中水旋如盤龍或試撓破之尋

手成龍狀驢馬飲之皆驚走

走蛇

六帖楊師晟師次方渠水乏有青蛇下走視其跡水從而流使築防環之遂為停淵軍士仰足命泉曰應聖

石門貪泉

晉吳隱之字處默為廣州刺史石門有貪泉俗云飲此水者廉士皆貪隱之酌而飲之為詩曰古人云此水一飲懷千金試使夷齊飲終當不易心又唐馮立為廣州都督見貪泉曰此豈隱之所酌耶吾雖日飲此水庸易吾性哉遂極飲而去

梁州廉泉

梓潼人范栢年。初見宋明帝。言及廣州貪泉。帝因問卿鄉土復有此泉否。答曰。梁益間惟有文川武鄉。廉泉讓水。不聞有貪泉。又問卿宅在何處。曰。臣所居在廉讓之間。帝嗟其善對。即拜梁州刺史。

### 鬱林瑞泉

鬱林城南南流江之濱。有紫泉。宋嘉定中。改名瑞泉。元至治初。御史張思敬。鐫瑞泉二字。勒碑於上。泉遂竭。居人去其碑。泉復如舊。

### 新喻醴泉

臨江府新喻縣西有醴泉。宋黃庭堅過此。飲之而甘。曰。惜張又新。陸鴻漸不及知也。因題其旁柱曰。醴泉。

### 蒼梧漫泉

梧州府蒼梧縣東門外。有冰井。南對火山。唐大曆三年。經略使元結飲之。其冽。作漫泉銘。有火山無火。冰井無冰之句。宋紹興間。知州任詔。砌為雙井。至今一清一濁。皆深可六七尺。

### 日南淫泉

拾遺錄。日南有泉曰淫泉。男女飲之則淫。又妙德先生嘗謂人曰。昔有一國有狂泉。飲之無不狂者。國君穿井自飲。獨得無恙。國人反謂國君不狂為狂。聚謀共執國君。灸艾針藥畢具。國君不任其苦。酌泉飲之。即狂矣。按妙德先生傳。袁粲作。

取泉置遞

芝田錄。唐李德裕任中書。愛飲常州惠山寺泉。自毗至京。置遞鋪號水遞。有一僧謁見曰。所謁相公者。為相公通常州水脉。京師一眼井。與惠山寺泉脉相通。德裕大笑其荒。唐僧曰。相公欲飲惠山泉。當在昊天觀。常住庫後取。德裕乃以惠山一甕。昊天一甕。雜以他水八瓶。暗記其處。遣僧辯析。僧因啜葷。止取惠山寺與昊天觀二甕。德裕大奇之。即停其水遞。由是人不敢勞。浮議遂息。按惠山。或曰慧山。

酌泉題楹

衡州府北甘泉寺。有萊公泉。宋寇萊公南遷日。題於東楹。曰。平仲酌泉經此。回望北闕。黯然而去。未幾。丁謂之過此。

題於西楹曰。謂之酌泉。禮佛而去。范諷留詩於寺曰。平仲酌泉回北望。謂之禮佛向南行。烟嵐翠鎖門前路。轉使高僧厭寵榮。淳熙中。南軒張栻榜此泉曰萊公泉。又青州府西門外有范公泉。宋范仲淹知青州。有惠政。泮溪側出醴泉。人以范公目之。今醫家用以丸藥。名青州白丸子。

一冷一溫

唐子西游湯泉記。惠州過水十餘里。得白水山。行一里許。得佛跡院。院中湧二泉。一冷一溫。二泉相去步武間。而東泉熱甚。殆不可觸指。以西泉解之。然後調適可浴。

半冷半溫

柳音琛。江乘縣東南有泉。半冷半溫。共出一壑。又柳州永興縣南。

山堂集卷之二十一  
有圓泉。半煖半冷。冷處極清。煖處極濁。

卓錫

唐子西卓錫泉記。吾遊羅浮至寶積寺。飲泉而甘。寺僧曰。此卓錫泉也。昔梁景泰禪師居此山。其徒以魚水難之。師笑而不答。已而庵成。師卓錫于地。泉湧數尺。自是得井。山中賴之。

投金

杜陽雜編滄洲。又視山下。出澄綠泉。亦謂之流綠渠。投之金石終不沉沒。

濺珠

四川龍州宣撫司東。泉瀉石崖。噴激如珠。名濺珠泉。

漿玉

四川黎州安撫司南。有漿玉泉。俗傳唐三藏至此。持梵音而泉湧。名梵音水。宋政和間。太守宇文侯過而飲之。曰佳泉也。易名漿玉。

瀑布

瀑布泉。是處有之。李白廬山瀑布詩。日照香爐生紫烟。遙看瀑布挂長川。飛流直下三千尺。疑是銀河落九天。

濯纓

濯纓泉。在成都府什邡縣北。宋程珣有詩。一在荊州府歸州東南。內有神蛇。人穢其水。其蛇輒見。

白道

大同府有白道泉。即飲馬長城處。

紅泥

臨洮府蘭縣東有紅泥泉。出阜蘭山下。

平疴

平疴泉在和州北。其水甚温。梁昭明太子浴於此。蘇軾秦觀劉貢父皆有詩。

知時

道州望仙門內有知時泉。鑿石象龍以道其流。夏至則盈。秋分則涸。宋紹興間。郡守辛公創亭而扁之。

鶴鳴

鶴鳴泉在潛山縣西真源宮。四時不竭。相傳白鶴道人嘗

止此。

虎跑

虎跑泉一在杭之南山大慈寺。距城十里。唐性空大禪師來遊此山。以無水將他之。忽神人告曰。自師來。我等微惠甚大。奈何棄去。南岳童子當遣二虎來移。師無憂也。翌日果見二虎跑山出泉。其冽勝常。大禪師因留建立伽藍。蘇東坡詩有虎移泉。赴行脚。蓋紀實云。

金沙

金沙泉在湖州府顧渚山。唐時進紫筍茶。太守具牲幣祭之。泉始發源。供御者畢。水即微減。供堂畢。水即減半。太守造茶畢。即涸矣。元正元間。中書省官致祭。一夕水溢。可溉

田千頃。賜名瑞應泉。

玉液

玉液泉。在隆慶府西南。元時取造玉液酒。故名。又江州有寶盃泉。徐陵文。泉流寶盃。遙憶湓城。

舞水

南陽府舞陽縣東南三河南岸。有舞水泉。泉踴躍若舞。故名。

滑石

桂林府靈川縣北。有龍隱泉。舊名滑石泉。宋鄒浩詩。馬頭今日度嚴關。十九年前去復還。惟有流泉聲似舊。凭欄重聽響潺潺。

一人

一人泉。在金陵鍾山高峰絕頂。僅容一勺。挹之不竭。王安石詩。塞淺一人泉。

七賢

七賢泉。在衛輝府輝縣山陽西社。竹林七賢。王戎向秀等也。

喜客

喜客泉。在茅山。客至則泉湧出。

惠民

惠民泉。在漳州府城北門外。

君子

君子泉在黃州府治北。宋通判孟震亨有賢德。時稱君子。庭中有泉。蘇東坡因名之。黃庭堅詩。雲夢澤邊君子泉。水無名字托人賢。

### 老翁

老翁泉在睢州。巖頤山東。其山高大。分為兩股。泉出兩股之間。北附右股之下。畜而為井。日可飲百家。宋蘇洵嘉祐集云。十數年前月夜。有一老翁。蒼顏白髮。偃息泉上。就之則隱而入於泉。弗見。洵斲以石建亭覆之。因作銘。

### 十九

十九泉在鞏昌府成縣。杜詩近接西南地。常懷十九泉。

### 六一

宋歐文忠公將老。自號六一居士。杭州西湖僧惠勤能詩。嘗受知於公。後公薨。勤亦逝。勤弟子畫六一公像。與勤像而祀之。有泉出講堂下。蘇東坡守杭。遂本勤意而名之曰六一泉。因為之銘。

### 雌雄

雌雄泉在夔州府梁山縣多喜山下。有雌雄二泉。春夏左盈右竭。秋冬左竭右盈。

### 男女

梧州府陸川縣有溫泉。在妙峒水旁。自竅中出。泉有二。左曰男泉。右曰女泉。

### 五眼

五眼泉。在臨洮府蘭縣臯蘭山下。泉有五眼。故名。相傳霍去病擊匈奴至此。以鞭卓地而泉出。成都府茂州沿有五福泉。吳江縣南有六品泉。唐陸羽品為第四泉。宋張又新品為東南第六泉。

百脉

百脉泉。在濟南府章丘縣南。百脉俱發。故名。宋曾鞏云。歷下諸泉。皆岱陰伏流所發。西則趵突為魁。東則百脉為冠。

杜康釀酒

杜康泉。在濟南府舜祠西廡下。世傳康於此釀酒。或以揚子江心水及惠山泉秤之一升。各重二十四銖。是泉重二十三銖。

陸羽試茶

湖廣沔陽州景陵縣西北有文學泉。唐陸羽得此泉。以試茶故名。

妬女

述異記。妬女泉。在并州。凡婦女靚粧彩服。至其地者。必興雷雨。

僕夫

僕夫泉。在杭州孤山。僧智圓有僕夫藝竹得泉。故名。又元時僧芳洲鑿地得此泉。遂名後僕夫泉。

細水

細水泉。在大同府盂縣東。其泉細微。而縈迴不絕。



小山

遼東都司義州衛西北有小山泉。按明朝遣將征虜。聞虜王脫古思脫木兒在捕魚兒海。遂由大寧慶州兼道而進。軍士無水渴甚。忽聞其地有聲如駁。使人視之。則泉水奔流。士馬就飲。眾咸歡呼曰。此朝廷之福也。先是上嘗夢殿西北隅有小山流泉。道下至御足所履而止。至是小山泉湧。適與夢符。

菩薩

蘇東坡序。寒溪少西數百步。則為西山寺。有泉色白而甘。號菩薩泉。李常侍謂予曰。豈昔阿育王所鑄文殊金像所在乎。

羅漢

羅漢泉。在瑞州府五峰山。上有羅漢像。橫臥水際。故名。

阿對

閩音文。河南閩鄉縣西南有阿對井。一名阿對泉。按阿對。本東漢楊震家僮。嘗引此井泉灌蔬。故唐吳融閩鄉卜居詩。六載抽毫侍禁闈。可堪哀病決然歸。五陵年少如相問。阿對泉頭一布衣。

參寥

參寥泉。在西湖智果寺。事見清明淘井。

墜筆

荊州府松滋縣南苦竹寺。有竹泉。宋至和初。有僧浚井。得

一筆。後黃庭堅謫黔過此。視筆曰。此吾蝦蟆培所墜也。因知此泉與蝦蟆培相通。

滌鉢

南雄府始興縣連城寺。有洗鉢泉。相傳大士雲遊至此滌鉢。

撫掌

圖經餘杭縣洞霄宮。有撫掌泉。相傳錢武肅王至宮。撫掌而泉湧出。

滴乳

四川順慶府西。有滴乳泉。昔有道士何志全飲此泉。年八十。面如桃紅。

潛虬

宜興縣顧山。有潛虬泉。幽深澄徹。中有異魚。四足能行。率數歲一出。出必有水災。

鳴犢

鳴犢泉。在西安府城南。鳴犢鎮。相傳因犢跑鳴得泉。故名。馬踐

隋史。烏鼠山。俗呼高武隴。其下渭水所出。絕壁千仞。諸羗

馬足所踐。忽飛泉湧出。號玉漿泉。

燕來

彬州城西。有燕泉。以燕來時泉生。去時泉涸。故名。宋折彥質居彬。剪茅為亭。名燕泉亭。

靈砂

圖經黃山東峰下有朱砂湯泉。可以點茶。春時色即微紅。昔人題詩三十六峰高倚天。瑤臺金闕貯神仙。嵩陽居與黃山比。猶少靈砂一道泉。

礪音部

礪石

蒼溪魚隱東坡所記湯泉。秦川之駱谷。渝州之陳氏山居。秦君之賦。東城及匡廬汝水。尉氏驪山。後謫居惠州。遊白水山。佛跡巖。浴於湯泉。共有其八矣。余之所見。新安之黃山。閩中之劍浦。亦有其二矣。第湯泉多作硫黃氣。浴之則襲人肌膚。惟驪山是礪石泉。竝無此氣。

玉龍

地理志唐天寶六年。更溫泉湯曰華清宮湯。治井為池。環山列宮室。制度宏麗。安祿山在范陽。以玉魚龍鳧鴈。石梁石蓮花以獻。上悅。命陳於湯中。因幸焉。將解衣而入。魚龍鳧鴈皆奮鱗舉翼。狀若飛動。上因恐却之。

石蟬

河南登封縣嵩山有白龜泉。泉有石蟬。客問道士楊洞曰。蟬旁行。天性乎。洞微以手指之。即直行。

感應

感應泉。在平樂府城北。宋鄒浩謫居昭州。以江水不可飲。汲於數里外。後所居嶺下。有泉湧出。及將北歸。數日前。泉乃涸。旋有人至門上厲聲曰。侍郎歸矣。翌日果拜命歸。至

山堂集卷二十二 常州卒楊時挽詩泉甘不出戶客至豈無神

安樂

叙州府涪溪側有泉味甘美盛夏水冽冬月則温黃庭堅號為安樂泉謂飲之令人安樂也

猪龍

眉州城石佛鎮乃蘇軾別業有猪龍泉軾嘗云聞百年前牝猪伏於此化為二鯉蓋猪龍也世莫有見者余偶見之以告妻兄王愿愿疑余誕因禱於泉二鯉復出疑始釋

蝦蟆

蝦蟆泉在河南陝州城西門外水自石眼中流出內生科斗禱雨即應唐韓文公詩居然鱗介不能容石眼環環水

一鍾聞道旱天祈得雨只疑科斗是蛟龍

穿巖越壑

詩史唐宣宗微時以武宗忌之遯跡為僧游方外與黃蘗禪師同觀瀑布泉禪師一聯云穿巖越壑不辭勞倒底方知出處高宣宗續之曰溪澗豈能留得住終歸大海作波濤

涵雲注玉

宋秦少游湯泉賦大江之濱東城之野有泉出焉直回峰負深谷分埒引源迤邐相屬晨夜有聲涵雲注玉薄為虎鬚沃為魚目鱗介莫潛遇者斯浴此何水也哉野老告余曰泓泓涓涓莫虞歲年不火而燠其名温泉嗚呼豈非熒

感滌於上耶。燭龍隱於中耶。旁通咸池。日御之所經耶。幽精沉魄。陰賞其負耶。丹砂黃硫金石之氣。酷悍之所激耶。

霹靂

南安府大庾嶺有霹靂泉。相傳宋時大旱。有僧致禱。一夕大雷雨。泉出於竇。故名。

參斗

湖廣均州東有參斗泉。雖千人汲之。此水不減。不汲亦不增。相傳參斗二星下臨。故名。

一脈縈莎

鄭谷石門山泉詩。一脈清冷何所之。縈莎漱蘚入僧池。

萬音落石

王介甫水簾泉詩。淙淙萬音落石巖。皎皎一派當簷前。清風高吹鸞鶴淚。白日下照蛟龍涎。浮雲裝額自能掩。缺少琢鈎相與懸。朱門試問幽人價。翡翠鮫綃不值錢。

湧出玉壺

濟南府西有趵突泉。一名瀑流。出山西王屋山下。元趙孟頫詩。樂水發源天下無。平地湧出白玉壺。谷虛只恐元氣泄。歲旱不愁東海枯。

界破冰綃

金線泉在濟南府西。石甃方池。泉亂發其下。東注城濠。澄澈見底。有金線一道。隱起水面。宋曾鞏詩。玉甃常浮顯氣鮮。金線不定路南泉。無風到底塵埃盡。界破冰綃一片天。

明月泉在太原府五臺山中。俗傳以紗帛障目。下視或見月在水中。

白雲

白雲泉在吳縣天平山。白樂天題以絕句。范文公繼此有作泉名逸著。

天齊

齊地記。泉中流出瓦。瓦上有天齊二字。晏子曰。吾聞江深五里。海深十里。此泉與天齊也。

雨湧

袁州府楊岐山有雨湧泉。相傳與海通天。欲雨。泉水先湧。

宋周允詩。楊岐山下出靈泉。與海相通亘古傳。洶湧便知天欲雨。為言陰石不須鞭。

蘆葭

酉陽雜俎。玉門有蘆葭泉。周二丈。深一丈。駝馬千頭飲之不渴。

茯苓

茯苓泉在杭州府靈隱寺後山。古松婆娑。泉極其冽。

谷簾

谷簾泉在南康府西。其水如簾。布巖而下者。三十餘派。唐陸羽茶經。品其水為天下第一。按此水出康王谷中。

石臼

圖經。施州南寨石白溪。其泉源有七眼。

上善

唐地理志。坊州郭中無水。東北七里有上善泉。開成二年。刺史張怡架水入城。以紓遠汲。四年。刺史崔駢復增修之。民獲其利。為立祠祀之。

潤德

潤德泉。在鳳翔府岐山縣西北周公廟傍。相傳時平則流。亂則竭。宋雍熙中。賜今名。有碑記。

宮集二十二卷終

山堂肆考地理第二十三卷

○潮

抱朴子曰。月精生水。故月盛則潮大。

盈虛繫月

盧肇海潮賦序。夫潮之生。因乎日也。其盈其虛。繫乎月也。日激水而潮生。月離日而潮大。此不刊之理也。余道安海潮圖序。陽燧取火於日。陰鑑取水於月。各從其類也。故月臨卯酉。則水漲於東西。月臨子午。則潮平於南北。彼竭此盈。往來不絕。皆繫於月。不繫於日。

往來應期

高麗圖經。潮汐往來。應期不爽。為天地之至信。古人嘗論

之。在山海經。以為海鱗之出入。浮屠書。以為神龍之變化。竇叔蒙海嶠志。以為水隨月之虧盈。盧肇海潮賦。以為日出於海。衝擊而成。王充論衡。以為水者地之血脉。隨氣進退。率未之盡。大抵天包水。水承地。而一元之氣。升降於太空之中。地秉水力。以自持。且與元氣升降。互為抑揚。而人不覺。亦猶坐於船中。而不知船之自運也。方其氣升。而地沉。則海水溢。而為潮。及其氣降。地浮。則海水縮。而為汐。計日十二辰。由子至巳。其氣為陽。而陽之氣。又自有升降。以運乎晝。由午至亥。其氣為陰。而陰之氣。又自有升降。以運乎夜。一晝一夜。合陰陽之氣。凡再升再降。故一日之間。潮汐皆再焉。又曰。當卯酉之月。則陰陽之交也。氣以交而盛。而盛故潮之大。獨異於餘日。

### 旗遊

臨安志。吳王既賜伍子胥死。乃取其屍。盛以鴟夷之革。浮之江中。子胥因流揚波。依潮來往。蕩激隄岸。勢不可禦。或有見其乘素車白馬。在潮頭者。因為立廟。仲秋既望。潮水極大。杭人以旗鼓遊之。弄潮之戲。蓋始於此。又云。子胥歿。戒其子曰。投吾於江中。吾當朝暮乘潮。以觀吳之敗。自是海門山潮頭洶湧。高數百尺。越錢塘漁浦。方漸低小。

### 弩射

梁開平四年。武肅王錢鏐。始築捍海塘。在候潮通江門外。



潮勢衝激版築不就。因命强弩數百以射潮頭。又數禱於胥山祠。既而潮水避錢塘。衝擊西陵。遂成堤岸。蘇東坡詩。江神河伯兩醯鷄。海若東來氣吐霓。安得夫差水犀手。三千强弩射潮低。仇近仁詩。一痕初見海門生。頃刻長驅作怒聲。萬馬突圍天鼓碎。六鰲翻背雪山傾。遠朝魏闕心猶在。直上嚴灘勢始平。寄語吾兒休踏浪。天吳罔象正縱橫。

半東半西

嶺外錄異。欽廉之潮。朔望則大。謂之先水。日止一潮。謂之小水。瓊海之潮。半月東流。半月西流。不繫月之盛衰。

再大再小

抱朴子曰。潮者言朝來也。汐者言夕至也。一月之間。天再

東再西。故潮水再大再小也。又夏時日居南宿。陰消陽盛。而天高一萬五千里。故夏潮大也。冬時日居北宿。陰盛陽消。而天卑一萬五千里。故冬潮小也。春時日居東宿。天高一萬五千里。故春潮漸起也。秋時日居西宿。而天卑一萬五千里。故秋潮漸減也。

三日不至

宋德祐丙子。元師入平安。呂文煥時駐軍江碛。宋方幸元師臨危。而海潮三日不至。師迄無虞。於是元獲占地利。宋都以覆。及祥興己卯。元師下廣海。張弘範遂進攻厓山。衆欲退師少休。而是日海潮不退。勢難廻却。於是元人盡日力戰。宋祚以滅。

三時為差

史氏伯璿曰。余氏候東南二海之潮。平於東者常。既於南者常。後每於三時為差。不知其所以有先後者。何故。蓋潮之長落。不過以北水南水候之而已。是故北水南來則為長。南水北來則為落。是潮之長。必自北而南也。然後知東南二海潮候有不同者。以此而已。然猶未知潮之長。必自北而南者。又何故也。蓋天以河圖示象於聖人。聖人以易象示教於天下。後世不信天與聖人。尚誰信哉。河圖以一六水居北。而後天八卦之方位。亦以坎為北方之卦。坎之象非水乎。是則北固水之定位也。潮之自北而南者。豈必外此而他求乎。

三水相蕩

抱朴子曰。天河從北極。分為兩條。至於南極。其一經南斗中。過其一經東斗中。過兩河隨天轉入地。過而下水相得。又與海水合。三水相蕩。而天轉之。故激湧而成潮。

兩水相合

早潮下。晚潮上。兩水相合。謂之沓潮。

○冰

禮月令孟冬之月。水始冰。地始凍。仲冬之月。水益壯。地始圻。季冬之月。水方盛。水澤腹堅。

納凌陰

詩豳風。二之日。鑿冰冲冲。三之日。納于凌陰。四之日。其蚤

獻羔祭韭。注云：凌陰冰室也。

脩盛器

周禮天官凌人掌冰。正歲十有二月令斬冰。三其凌。春始治鑑。祭祀供水鑑。賓客供水。大喪供夷槃冰。夏頒冰。掌事。秋刷。注云：三其凌，三倍其冰也。鑑如瓶，大口以盛冰。置食物其中。正月修飾盛冰之器。至二月將獻羔而啟冰也。夷，尸也。實冰於夷槃中，置之尸牀之下。所以寒尸。夏四月掌事。王賜冰之多少。七月始刷冰室，將納新冰。

狐聽

離騷經注：狐多疑而善聽。河水合，狐欲渡，必帖耳先聽。無水聲而後過。故人過河者，要須狐行，然後敢渡。

蟲疑

晉孫綽天台賦：晒夏蟲之疑冰，整輕翮而思矯。按莊子曰：夏蟲不可以語於冰者，篤於時也。

藏山

左昭四年，申豐曰：古者日在北陸而藏冰，西陸朝覲而出之，其藏冰也，深山窮谷，涸陰沍寒，於是乎取之，其出之也，朝之祿位，賓客喪祭，於是乎用之，藏之也，周用之也，徧則久，無愆陽，夏無伏陰，民不夭札。

薦廟

禮月令：仲冬，天子獻羔，開冰，先薦寢廟。

梓慎占饑

見星淫枵。

令狐夢立

統音騰

晉令狐策夢立冰上。與冰下人語。索統占曰。當為人作媒。冰判時成婚。忽遇太守田豹。托策為媒。求張公徵之女為婚。至仲春果成。

神人膚

莊子曰。藐姑射之山。有神人焉。肌膚若冰雪。

妃子淚

開元遺事。楊太真初入宮。與父母別。淚落凍成紅冰。

光武渡河

東漢光武至蘄上。王郎追兵至。上發劍晨夜馳至滹沱河。

道吏還言。河水流澌。無船不可渡。復遣黃霸往視。霸以驚眾還曰。冰堅可渡。比至河。冰已合。帝遂得渡。

慕容行海

見海。

冰厚五寸

齊景公伐魯。得東門無澤。問曰。魯年穀何如。對曰。陰不凝陽。冰厚五寸。寒溫節也。寒溫節則政平。政平則年穀孰。請禮魯以息怨。

冰厚六尺

漢晁錯上書。胡貉之地。積陰之處。水皮三寸。冰厚六尺。神異經。北方有層冰萬里。厚百尺。

北鼠

東方朔神異記。北方冰厚百尺。有鼠在冰上食。其鼠毛長八尺。可為布。

東蠶

拾遺記。東海員嶠山。冰蠶長七寸。有鱗角。以霜雪覆之。始作繭。其色五彩。織為文錦。入水不濡。投火不燎。

投丸潰賊

東漢黃巾賊起。青州刺史焦和。恐賊乘冰渡河。多作陷冰丸。投河中。賊眾遂潰。

煮茗供賓

六帖。逸人王休。居太白山下。每冬取溪水。琢其精瑩者。煮

茗以供賓客。

千年不釋

杜陽雜編。拘彌國有大疑山。其中有冰千年不釋。謂之常堅冰。

六月猶堅

戴延之西征記。凌雲臺有水井。延之六月持去。經日其冰猶堅。

貯玉盤

拾遺記。董偃以玉精為盤。貯冰於內。

玩玉筋

見冬至。

瑯琊井

東漢書靈帝元和六年冬北海東萊瑯琊井冰厚丈餘

宣陽室

晉陸機洛陽記冰室在宣陽門內天子用以賜王公百官

象王

曹植七念素冰象王難可磨蕩結土成龍遭雨則傷

比珠

顧愷之冰賦緗白隨川方圓隨渠託形超象比朗玄珠

積冰為樓

三輔黃圖漢建章宮北積冰為樓

敲冰成胎

宋楊廷秀詩稚子金盆照曉冰彩絲穿取當銀鈺敲成玉  
聲穿林響忽作玻璃碎地聲

子馮闕地

左襄二十一年楚子使蘧子馮為令尹蘧以疾辭方暑闕  
地下冰而牀焉重繭衣裘鮮食而寢楚子使醫視之復曰  
瘠則甚矣而血氣未動

楊氏琢山

見時令伏日

農桑起

家語霜降而婦功成娶者行焉冰泮而農桑起婚禮殺焉  
男女合

風俗通周禮媒氏因三十之男二十之女冰泮鳴鴈於是  
手合。

### 賜汝南

八王故事汝南王葬詔賜冰五斛。

### 送趙郡

北齊趙郡王叡為定州刺史監築長城有送冰者叡曰人  
皆飲溫水我何獨進寒冰遂至消不進軍中感悅。

### 取冰無價

唐白樂天為刺史三年飲冰復食藥又止戈集長安冰雪  
至夏月則價等金璧惟白少傅詩名動於閭閻每需冰雪  
論筐取之不復償價。

### 食冰洗腸

宋程伯淳長嘯巖中食冰甚佳詩云車倦人煩渴思長巖  
中冰片玉成方老僊笑我塵勞乞與雲膏洗俗腸。

○火

莊子曰木與火相摩則燃金與火相守則流白澤  
圖火之精曰宋無忌春秋考異火者陽之精。

### 流為赤鳥

史記武王渡河有火自上復下至於王屋流為鳥其色赤  
其聲魄。

### 化為白雀

魚豢典略秦伯出獵至咸陽有大火流下化為白雀晰綠

字責書集於公車。

玉石俱焚

夏書火炎崑岡玉石俱焚。

芝艾俱盡

淮南子曰順風縱火紫芝與蕭艾俱盡抱朴子曰慮巫山之失火恐芝艾之并焚。

春出秋內

燿音貫夏官司燿掌火之政令季春出火民咸從之季秋內火民亦如之。

春起秋滅

抱朴子曰南海蕭丘之上有自生之火春起秋滅丘生上

一種木雖為火所着但小焦黑人或得以為薪炊熱則灌滅之用之不窮。

守金則流

莊子曰木與火相摩則燃金與火相守則流。

積油自生

博物志積油萬石則自然生火晉泰始中武庫火積油所致也庫有漢高祖斬蛇劍王莽頭孔子袞畫焚焉。

鳥鳴社

左襄三十年五月或叫於宋太廟曰譖譖出出鳥鳴於臺社如曰譖譖甲午宋大災宋伯姬卒君子謂宋共姬女而不婦女待人婦義事也。

共音恭



鷓鴣樹

拾遺記燧明國不識四時晝夜有火樹名燧木屈盤萬頃有鳥名鷓鴣樹則燦然火出聖人感焉因取小枝以鑽火號燧人氏。

樂喜塗屋

左襄九年春宋災樂喜為司城以為政使伯氏司里火所未至徹小屋塗大屋陳畚揭具綆正備水器量輕重畜水澆積土塗廵丈城繕守備表火道使華臣具正徒令隧正納郊保奔火所。

襄子燔林

列子曰趙襄子率徒十萬狩於中山藉為燔林燔赫百里

畚揭音本柳綆音梗

苒音仍

有一人自石壁中出從燼上下眾謂鬼神襄子徐察之形色七竅人也氣息聲音人也問奚道而處石奚道而入火其人曰奚物而謂石奚物而謂火按草交陳者而新者又生曰苒。

老槐

莊子曰老槐生火父血為燐燐野火也。

槁竹

淮南子曰槁竹有火弗鑽不燃土中有水弗掘無泉。

衛於白首

山海經崦嵫山之上其狀如鷓鴣赤身白首名曰竊脂鷓音氏可以衛火又曰符愚之山有鳥名鷓其狀如翠而赤喙可

以衛火。

撲於青衣

拾遺記糜竺賢貨如丘山忽有青衣童子云。若當有火厄。賴君能惻愍枯骨。故來禳却。使君財物不盡焚之。旬日火起。燒其珠玉十分之一。火盛之時。見數十青衣童子來撲。火有青氣。如雲覆於火上。童子又云。多聚燕雀之類。以禳災。蓋燕能聚水。巢梁也。家人乃收集鷓鴣數十。養於池渠之中。以厭火災。

鷓鴣音交精

炎山草木

玄中記南山有炎火山。四月生火。十二月火滅。火滅之後。草木皆生枝葉。火燃草木葉落。如中國寒時也。取此水以

為薪。燃之不盡。以其皮績之。為火浣布。

夢澤雲霓

戰國策。楚王遊雲夢。野火之起也。若雲霓。

屋燕

呂氏春秋。燕雀爭處于一屋之下。子母相哺。姁姁焉相樂。以為安矣。突決。上焚棟宇。燕雀顏色不變。是何也不知禍之將及已也。

池魚

風俗通。城門失火。禍及池魚。百家書。宋城門失火。汲取池水沃之。魚悉露見。因就取之。故云禍及池魚。

奔秦奔楚

瑣語智伯敗夢火見於西方乃出奔秦又夢火見於南方遂奔楚。

爨柘爨松

淮南子曰夏爨柘燧火冬爨松燧火。

神丘穴

括地圖神丘有火穴光照千里。

臨邛井

見井。

孫子墜營

孫子兵法火攻有五。一曰火人。二曰火積。三曰火輜。四曰火庫。五曰火墜。注云火人謂近草則燒之火積燒其積聚。

火輜燒其輜重。火庫燒敵兵庫。火墜射火墜敵營也。

管寧得島

傅子曰管寧嘗浮海遇暴風餘船皆沒莫知所適忽望見火光趨之得島島無居人又無火燼眾以為神光之祐。

冒火伏柩

郡國志長沙古初父喪未葬隣家火起初冒火伏棺上火乃滅又汝南先賢傳蔡君仲母終棺在堂西舍失火君仲伏棺號哭火越向東家按君仲順字。

燃火塞戶

見篤學。

燃石

拾遺記秦始皇時有宛渠之民乘蠡舟汎黑木而至始皇與之語及天地初開之時了如親見又曰臣之國去咸池日沒之所九萬里日月之所不照以萬歲為晝萬歲為夜其晝則天豁然中開濶數百丈萬歲還合則為一日也則琢燃石以代日光此石出於燃山其土石皆有光明斫之則火出火大如粟而輝耀一室

熒臺

郡國志連渾府遙火山西有火井深不見底炎氣上升常若微電以草爨之則煙騰火發名為熒臺

牧兒求羊

三輔黃圖秦始皇葬驪山六年之間為項羽所發牧兒放

羊而墮羊塚中燃火求羊擲藏被燒

宮吏照燕

六帖秦始皇時吳宮吏以火照燕巢因燒吳宮

束帛而賀

韓詩外傳晉文公藏寶臺火公子晏束帛而賀曰王者藏於天下諸侯藏於百姓農夫藏於困庾商賈藏於篋櫃今百姓之於外而賦歛無已皇天降災於藏臺是君之福也

竊樵以繼

梁書阮孝緒家貧無以爨僮僕竊隣人樵以繼火孝緒知之乃不食更令徹屋而炊

郭憲厭齊

汝南先賢傳。鄭憲從南郊。含酒東北三喫。云齊火。以酒厭之。後齊果上火事。

圖澄救燕

晉書。佛圖澄嘗與石季龍升中臺。忽驚曰。變變。幽州當火。災乃取酒喫之。久而笑曰。救已得矣。石季龍遣驗。云邇日火從四門起。西南有黑雲來。驟雨滅之。雨有酒氣。

禳玄冥

左昭十八年。鄭子產禳火於玄冥。回祿。注。玄冥。水神。回祿。火神。

逐畢方

山海經。章義之山。有鳥如鶴。一足。赤文。白喙。名曰畢方。見

則其邑有譌火。譌火。妖火也。故唐元和中元年。永州夏多火災。柳子厚有逐畢方文。

燒門

吳志。張昭字子布。孫權以公孫淵稱藩。遣張彌許晏到遼東。拜為燕王。昭諫不從。稱疾不朝。權怒。以土塞其門。昭又於內以土封之。後淵果殺彌晏。權數慰謝。昭固不起。權以火燒其門。恐之。昭更閉戶。權使人滅火。親往問昭。諸子扶起。權載昭以還。

改肆

舊唐書。宋璟轉廣州都督。廣舊以竹茅為屋。屢有火災。璟教人燒瓦。改造店肆。自是無復火患。人皆懷惠。

鳥銜

鄧音只拾遺記鄧奇字君珍喪親盡禮嘗去墓夜行有鳥銜火夾之。

羊轉

宋趙普一日見空中火一團又有一羔羊轉運其上乃拜曰普之罪也須臾火滅遂得疾而卒。

得薪保燭

晉書嵇康從孫登遊三年將別登曰子識火乎火生必有光而不用其光果然在於用光人生而有才而不用其才果然在於用才故用光在乎得薪所以保其燭用才在乎識真所以全其年今子多才寡識難乎免於今之世康不

能用果遭非命又戴逵曰火憑薪以傳燭人資氣以享年

起屋厭災

沈約宋書凡殿屋之上為圓泉方井兼荷花者以厭火災也。

詣縣請備

鄭玄別傳玄年十七在家見大風起詣縣曰某時當有火災宜廣設禁備後火果起而不為害。

入市言災

廣記天師翟乾祐因入夔州市謂人曰今夜有八人過此宜善待之是夕火燒百餘家八人乃火字也。

償承

後漢梁鴻字伯鸞扶風平陵人不為章句學牧豕林中誤遺火延及他舍鴻乃悉以豕償之隣家耆老見鴻非恒人責讓主人悉還其豕鴻不受而去

驅鷄

見將帥

周嵩投燭

顛音以晉書周顛弟嵩嘗因酒醉瞑目謂顛曰君才不及弟何乃橫得盛名以所執蠟燭投之顛神色無忤徐曰阿奴火攻固出下策

彥回索輿

齊褚彥回宅失火煙焰逼甚左右驚擾彥回神色怡然索

輿徐去

黔廬赭垣

唐柳子厚賀進士王參元失火書僕始聞而疑終乃大喜人多言足下家有積貨士之好廉名者皆畏忌不敢道一唯音咎出口則嗤嗤者以為得重賂今乃為天火之所滌蕩黔其廬赭其垣以示其無有而足下之才乃可以顯白而不污其實出矣是祝融回祿之陰相吾子也

壞墻穴牖

柳子曰永州多火災五年之間四為火所迫跣足出壞墻壁穴戶牖僅免燔灼一遇火災累日茫洋不能出言怨家所藝

齊沈冲。吳興人。與兄淡深並歷位中丞。被案裁者多怨。冲母在東隣。其家失火。疑為人所藝。乃大呼曰。我三兒皆御史中丞。與人豈有善者。方恐肌分骨散。何但焚如。故論者曰。沈母致懼中丞。其戒深矣。

奸民所為

宋張詠在金陵。金陵多火災。居者不安。詠廉知皆奸民所為。請於神宗。神宗命先折其脛。斬之以徇。火患遂息。

*山堂肆考地理第二十四卷*

山堂肆考地理第二十四卷

池

說文池沼也。穿地鍾水也。

飲馬

廬州府含山縣有飲馬池。卓刀泉在東關之巔。相傳關羽卓刀於泉。飲馬於池。

躍龍

成都府東南有躍龍池。相傳隋開皇中伐陳。鑿大池以習水戰。郡志蜀王秀取土築城。因為池。有胡僧見之曰。摩訶宮昆羅蓋以摩訶池為大。宮昆羅為龍。言此池廣大有龍也。



留犢

壽州西南有留犢池。魏時苗為壽春令。始之官。惇牛生一犢。及去。留之。故池以此得名。

靜蛙

湖州府安吉縣常樂寺。有靜蛙池。昔肇法師厭蛙聲。聒耳驅而去。至今池中不生科斗。長沙府善化縣獄麓書院前。有池。夏無蛙聲。相傳宋張栻讀書於此。厭蛙聲。禁之。乃息。南陽府新野東北。有彈子池。世傳漢光武彈蛙於此。至今有蛙不鳴。

玩鷺

宜興縣南有玩鷺池。相傳王羲之玩鷺處。

鳴鶴

三秦記。魏在洛有天泉池。流盃池。陰流池。鳴鶴池。在鄴有瓊華池。淶水池。玄武池。

影娥

漢武帝登俯月臺。月影入池中。如仙人乘舟。笑弄月影。因名影娥池。

落妃

楊貴妃。小字玉環。弘農華陰人。後徙居蒲州。永樂之獨頭村。高祖令本。金州刺史。父玄琰。蜀州司戶。妃生於蜀。嘗誤落池中。後人呼為落妃池。池在導江縣前。

飲軍

慶遠府宜山縣城南有飲軍池。宋景德四年軍校陳進叛圍縣城時池水又涸。爾湧出。閣門使曹利平賊飲軍於此池故名。

浴仙

南昌府子城東有飲馬池。一名浴仙池。相傳有少年見美女七人脫五綵衣於岸側浴池中。少年戲藏其一。諸女浴竟着衣化白鶴去。獨失衣女不能去。隨至少年家為夫婦。約以三年還其衣亦飛去。

洗耳

和州之西有許由宅。宅旁有洗耳池。如意

杭州北山勝蹟有大悲泉。如意池。大悲泉在講堂下。流繞殿前。經如意池。池以青石為之。在方丈西。鏤如意文。曲折迴旋可流觴焉。

芙蓉

湖州府東白蘋洲上有芙蓉池。中多千葉蓮。唐開成中刺史楊漢公所鑿。

蓬萊

唐憲宗嘗畋苑中。至蓬萊池。謂左右曰。李絳嘗以諫我。今可返也。其見禮憚如此。

聖母

徽州府黟縣東嶽廟後山有聖母祠。前有池。曰聖母池。泉

白如玉。民有相訟者。各執楮錢禱之。實則沉虛則浮。

仙女

柳州府象州東雷山之巔有仙女池。深丈餘。有仙女廟在焉。

靈芝

晉宮闕記靈芝池。有鳴鶴舟。指南舟。魏黃初元年。有鷓鴣集焉。

嘉蓮

嘉蓮池。在無為州城北。池中多植嘉蓮。顛州府零都縣西有瑞蓮池。其蓮葉雙捲而劍脊。其花雙頭。其實曰覆鍾金。鋌移之他處。輒類常種。俗傳零山倒影所致。

積翠

唐太宗宴群臣積翠池。酣樂賦詩。魏徵賦西漢。其卒章曰。終藉叔孫禮。方知天子尊。帝曰。徵言未嘗不約。我以禮。

凝碧

凝碧池在西安府城東南。唐禁苑中。安祿山反。給事中王維為其所得。祿山大宴凝碧池。維聞悲甚。賦詩痛悼云。萬戶傷心生野煙。百官何日再朝天。秋槐落葉空宮裏。凝碧池頭咽管絃。後盜平。或以此詩聞。故維得減論。下遷太子中允。

興慶

唐景龍中。中宗遊興慶池。侍宴者遮起歌舞。并唱迴波詞。

宣雜失禮次。諫議大夫李景伯亦起歌曰。迴波爾。時酒卮。徵臣職在箴規。侍宴既過三爵。誼謹竊恐非宜。於是罷坐葆真。

世說。葆真池。即梁惠王故沼。宋陳去非有夏集葆真池詩。覆杯。

覆杯池。在金陵古臺城。太初宮中。昔晉元帝頗以酒廢政。王導諫之。帝因覆杯池中以為戒。

洗鉢

地紀。紫金山有猿驚鶴怨二谷。道卿太子二巖。定心石。桃花芙蓉道士三塢。洗鉢池。應潮井。道光泉。

牡丹

牡丹池在嘉定州大巴縣牡丹亭側。片葉纖芥墜池中。則鴛鴦野鷺之類。即啣去之。

菱花

菱花池在南陽府鎮平縣西南。俗名天池。廣五里餘。中有菱藕蒲芡之類。

鳳凰

一在鳳陽府城西北。相傳有鳳宿於此。後魏有鴻鴈池。鷺鴨。

見雪夜襲蔡城。

洗參

鄆德府林縣西。有洗參池。相傳為王母洗藥之所。

漚麻

漚麻池在開封府。後趙王石勒微時與李陽隣居。數爭漚麻池。相毆。及即位。召陽與飲。引陽臂曰。孤往日厭卿老拳。卿亦飽孤毒手。池在山西遼州和順縣東北李陽村。

太液

漢建章宮北有太液池。中有蓬萊方丈瀛州壺梁。以象海中神山。又刻石為鯨魚。池邊多雕菰紫蘆及鷓鴣鶉鷩之類。動輒成羣。

善泉

金陵古臺城東有善泉池。梁昭明太子所鑿。中有亭榭洲島。太子泛舟池中。嘗曰。何必絲與竹。山水可忘情。

承露

三秦記漢上林苑有承露池。昆靈池。中有倒披蓮。連錢行。浣雲。

杭州舊報恩寺中。有舞鳳軒。浣雲池。今萬松書院其故址也。白樂天詩。白雲本無心。舒卷長自潔。影落一鑑空。可浣不可涅。鳶飛魚躍間。上下俱澄徹。此意難與言。覽之自怡悅。

花馬

花馬池在陝西慶陽府城北。周圍四十三里。與馬槽字羅濫泥鍋底等池相近。

菌鶴

菌音郡

漢上林苑中有菌鶴池當路池太乙池牛首池積草池池  
中珊瑚樹高一丈二尺一本三柯四百六十條。

報恩

丹陽縣謝家場北有報恩池相傳王姓者好食鱉一市必  
數枚庖婢每竊一二放之事覺恐被撻自投於池鱉叢負  
得不死故池名報恩。

放生

唐肅宗詔天下臨城帶郭置放生池始於洋州興道迄於  
昇州江寧凡八十一所顏真卿為碑銘古今詩話載唐末  
以邕州蔡大夫遷江西撫州刺史遊汝水放生池禁人採  
捕忽有人乘小舟釣其上蔡使人捕之釣者為詩云投却

長竿捲釣絲。手携篋管獻新詩。臨川太守清如水。不是漁  
人下釣時。遂得免罪。宋天禧四年王欽若請以西湖為放  
生池慶元初京兆尹趙師異亦請以西湖為放生池司業  
高炳如作記。

鱷魚

廣西梧州府城東有鱷魚池搜神記扶南王范尋常養鱷  
魚十頭有犯罪者投之不噬則赦之廣東潮州府城東有  
鱷溪溪有鱷魚四足黃身脩尾形如鼉舉止趨疾口森鋸  
齒往往為人害鹿行崖山羣鱷鳴吼鹿必怖懼為鱷所得  
唐韓愈為刺史作文驅之鱷徙去六十里宋陳堯佐通判  
潮州以鱷食人命吏督漁者網而得之鳴鼓告其罪戮之

於市。

角鯉

角鯉池在長沙府醴泉縣東。宋天聖中丁少連侍母觀網魚得火鯉命膾之庖人驚報魚頂有角魚已潰歿少連祝曰魚若變化分當再活試之以水圍圍如初遂放於清石潭。盧載為作送角鯉文。

金斗

金斗池在廬州府治。按天文一星在南斗曰合肥對九江星夾輔黃道。今合肥縣入斗。度獨多故號金斗城。而池名金斗亦取此義。

玉壺

元元統間丞相莫率捨地與僧法藏建普光庵中有玉壺池。

百子

百子池在陝西西安府漢宮中。嘗以七月七日臨百子池。江西豐城縣有九子池。

七女

七女池在漢中府洋縣。昔人無男生七女。父沒女各負土合為一塚遂成此池。

日月

日月池在會稽縣東北。俗傳錢武肅王有目疾故浚此池。名以日月。

風雨

風雨池在南昌府洪井之北。西山之巔。一名梅福種蓮池。唐張九齡為都督。嘗禱雨有應。立風雨池廟以祀之。

池有劫灰

班固  
二音

曹毗志。漢武帝鑿昆明池極深。中間悉是灰墨。無復有土。舉朝不解。以問東方朔。朔曰。臣愚不足以知之。可試問西域胡法蘭。至明帝時。外國道人來洛陽。有憶方朔言者。乃試以昆明池灰墨問之。胡人云。天地大劫將盡。則劫燒此劫燒之餘也。謂之劫灰。方知朔言有旨。按昆明本西南夷國名。即滇國也。滇池在雲南府城南。周廣五百里。合盤龍江及黃龍溪諸水。匯為此池。中產衣鉢蓮花。盤千葉。莖分

三色。下流為螳螂川。中有大小臥納二山。後為漢武帝平之。以其地為益州郡。其所鑿昆明池。在今西安府城內上林苑中。帝欲伐昆明夷。以其國有滇池。乃穿池象之。以習水戰。周迴四十里。其中有戈船樓船數百艘。置二石人相對。以象牽牛織女。刻石為鯨魚。每雷動常吼。鬚鬣皆動。至昭帝幼沖。不習攻戰。于中養魚。以給諸陵。又關中記所載。堯治水訖。停舟昆明池。則此池堯時已有。漢特因而深之耳。史記滇水源廣末狹。有似倒流。故曰滇。

池砌文石

杜陽雜編。唐元載芸暉堂前有池。悉以文石砌岸。中有蘋陽花。亦類白蘋。其花紅而且大。若牡丹。又有碧芙蓉。



米芾投蛙

無為州西北有墨池。宋米芾為守時所穿。初厭池中蛙聲。取瓦書字投之。自是無蛙鳴。

習郁養魚

襄陽記。荆陽峴山南有習家魚池。後漢習穿此池。依范蠡養魚法。中有釣臺。晉山簡永嘉三年鎮襄陽。每出遊戲。多在池上。飲輒醉而歸。名曰高陽池。

採珠

廉州府城東南有珠母海。海中有平江。懸梅青嬰三池。池中出大蚌。蚌中有珠。每月明之夜。其光燭天。即古合浦珠也。人採珠者。乘舟入池。以長繩繫腰。携竹籃入水。拾蚌置

竹籃內。則振繩令舟人汲取之。不幸遇惡魚。有一線之血浮水面。則知人已斃魚腹矣。

淬鐵

宋歐陽程。永州府營道人。少為郡吏。郡後有池。常淬鐵為戎器。名鐵作池。植亭其旁。一日太守於吏牘間得副紙。記池亭之勝。有寒影倒吞凌漢樹。冷光高浴半天星之句。問知為程詩。大驚異之。與之金。使歸為學。登進士第。累官屯田員外郎。

臥冰

望江縣地稱三孝。有孟宗泣竹臺。徐仲源孝感山。其一則王祥臥冰池也。

凌波

太真外傳唐玄宗在東郡書夢一女容貌艷異拜於牀前上問汝是何人對曰妾是陛下凌波池中龍女衛宮護駕妾實有功今陛下洞曉鈞天之樂乞賜一曲以光族類上於夢中為鼓胡琴採新舊之曲為凌波曲龍女再拜而去及覺上盡記之會禁樂乃自御琵琶習而翻之與文武臣僚於凌波宮臨池奏新曲池中波濤湧起復有神女出池心乃所夢之女也上大悅語於宰相因於池上立廟歲祀焉

聖水

乾道間高僧能取池水吃之以

施病者輒愈號聖水池

仙源

仙源池在四川叙州府南溪縣北劉景鶴嘗用此水以煉丹

醒酒

宋時洛陽有董氏東西園園中有大池中為堂榜曰含碧水四面噴瀉池中而陰出之故朝夕如飛瀑而池不溢洛陽人盛醉走登其堂輒醒故俗號池曰醒酒池

浴丹

浴丹池在保寧府劔安普安廢縣唐杜光庭煉丹之所產焉

四川黎州安撫司蠻部有池。內產馬。名渥洼池。

棄龜

宋徽宗大觀中。都水使者趙霆。行兩首龜於黃河。獻以為瑞。蔡京曰。此齊小白所謂象罔。見之而霸者也。鄭居中言。首豈有二。人皆駭異。而京獨主之。殆不可測。帝命棄龜於金明池。按金明池。周世宗時所穿。宋太祖嘗幸此。觀習水戰。

太子

吳有太子池。孫權子和所穿。

相國

相國池。在湖州府烏程縣治內。唐大曆中。李晤官於烏程。

子紳甫一歲。數墮此池。若有物扶持而出。後為相國。後人因以名池。

皓月

汝寧府確山縣西北有朗山。避宋廟諱。改名樂山。山頂有池。名皓月。中有四季蓮花。可供遊賞。

瑞星

廣東雷州府南有瑞星池。即寇萊公舊居也。宋天聖間。有星隕於池。翌日求之。得一石。

金龍

金龍池。在平陽府平山之麓。晉永嘉中。有韓媪者。於野中。擲音貴。見巨卵。育之。得嬰兒。字曰擲兒。方四歲。劉淵築平陽城。不

就募能城者。擲兒應募。因化為蛇。令媪遺灰誌其後。謂媪曰。憑灰築城可立。竟如所言。淵怪異之。命使追蛇。遂投入山穴中。露尾數寸。使者斬之。忽有泉自穴中出。匯而為池。因名金龍。

金鷺

金鷺池在丹陽縣治內。宋夏竦為本縣掾。一日侍母燕坐。見黃鸝雙沒於地。發之得金鷺二。其母取瘞之。竦因亭其上。後人發地求之。不得。遂為池。因名金鷺。

義之滌墨

義音疾。紹興嚴山戒珠寺前。有鷺池。晉王羲之善筆札。性復好鷺。所在穿池滌墨。其旁有牧鷺之所。

蔡倫造紙

衡州府耒陽縣西南。有蔡子池。漢蔡倫造紙處。

洲

水中漲沙曰洲

鸚鵡

鸚鵡洲在武昌府通城縣南。跨城西大江中。尾直黃鵠磯。卽黃祖殺禰衡處。衡嘗作鸚鵡賦。少葬於此。因以名洲。

騏驎

騏驎洲在邵武府泰寧縣西南。昔越王戲馬於此。

白鷺

白鷺洲在應天府西南江中。唐李白詩。二水中分白鷺洲。

宋曹彬大破江南兵。即此處也。一在廬陵城東贛江中。  
黃龍

黃龍洲在延平府城東。每春水後。視此洲沙多寡。占歲豐  
歉。

白馬

白馬洲在岳州府澧州之東。相傳為唐林靜先生乘白馬  
飛昇處。

黃牛

黃牛洲在南昌府城西南。相傳許遜逐蛟精。蛟化為黃牛  
於此。因名。

金沙

金沙洲在岳州府洞庭湖中。一名龍堆。延袤數里。又名金  
沙堆。

寶蓋

寶蓋洲在建寧府建陽縣北。相傳閩王審知有一叛將敗  
亡。以其所竊寶蓋棄此。因名。

乘龍

乘龍洲在鳳陽舊府城北。淮水中。昔周世宗征濠。夜遣兵  
持炬乘索。馳絕濠。兵士驚以為鬼乘龍也。因以名洲。

繫龍

潯州城東五里大江中。有繫龍洲。首戴石阜。尾蟠石鱗。宛  
然龍形。中有沙石。或斷或續。直至城西隅。若貫索鎖繫此。

水經注卷之二十四 潯州 繫龍洲

龍故名。每冬月水涸，則桂江與大江之舟皆循流至洲尾，乃汴流而上。蓋天造地設，以鎮梧州水口云。

鳳麟

鳳麟洲在西海中央，地方一千五百里。洲四面有弱水，遶之。馮毛不浮，不可越也。洲上有鳳麟數萬，各自為羣。

龍馬

龍馬洲在南昌府進賢縣北，軍山湖畔。舉目有湖山之勝，文士多樂遊之。

彭城

彭城洲在岳州府城東北。劉宋元嘉中，謝晦反，到彥之進討，軍次彭城洲，即此。

羅刹

羅刹洲在安慶府境。宋端平初，移治於羅刹洲，又移於楊槎洲。至景定初，始移治宣城渡，今府城是也。

大哀小哀

大小哀洲在長沙府湘陰縣南。昔虞舜南巡，二妃從之，不及，哭弔於此。

南布東布

通州南四十里大江中。沙漲為洲，有南布洲、東布洲。相傳有布機流至沙上，因名。

杜若

謝眺詩：芳洲生杜若。宋陸游詠叙州西樓詩：畫船衝雨入。

戎州縹緲山橫杜若洲。須信平時邊堠靜。傳風夜夜到西樓。

荔枝

荔枝洲在廣州府城東。周圍可五十里。南漢劉氏嘗創昌華苑於其上。

金魚

金魚洲在長沙府醴陵治前。其狀如魚。一在泰和縣東。

銅魚

銅魚洲在四川順慶府渠縣南。下有石磧。黃色如魚狀。舊傳開科之歲。水聲異常。必有中者。諺云銅魚灘聲吼。士子占科首。

馬渡洲

廉州府珠母海中有圍洲。周迴一百里。昔有野馬渡。此又名馬渡洲。

鴻宿洲

鴻宿洲在黃州府蘄州西大江中。秋冬有鴻集于此。

白蘋

白蘋洲在湖州府霅溪東南。梁太守柳暉江南曲云汀洲採白蘋。日暮江南春。後人因以名洲。上有白蘋亭。

紫苑

紫苑洲在湖廣寶慶府武岡州。以洲產紫苑故名。

訾家洲

山堂集卷之二十四卷  
十一  
些家洲在桂林府城東南。先是為些家所居。故名。雖巨浸不能沒。自古以為浮洲。柳宗元有記。

吳家洲

吳家洲在南昌府西南。相傳吳綵鸞至此。故名。上有聖母廟。又有滕家郭家二洲。南北相去十數里。又豐城縣有三洲。謂楊林洲。金雞洲。牛宿洲也。

狀元

狀元洲在醴陵縣治前。相傳洲過縣前。即出狀元。

大人

言行錄。宋時逆亮犯順。李顯忠以池州都督移軍舒城。除御營先鋒都統制。堠騎報虜兵萬人渡淮。公領趙康年等

與虜戰於大人洲。首挫其鋒。乘勝掩擊。過淮。虜兵溺死者千餘人。

橘洲

橘洲在長沙府善化縣西。上多美橘。故名。又湘江中有四洲。曰橘洲。曰道洲。曰誓洲。曰白小洲。夏月水泛。惟橘洲不沒。諺云。昭潭無底橘洲浮。

蘆洲

蘆洲在武昌縣西。相傳伍子胥逃楚。至江上求渡。漁父曰。灼灼兮。侵已私。與子期兮。蘆之漪。子胥既渡。解劍與之。不受。子胥令其勿露。漁父遂覆舟而死。即此處。

爛船



爛船洲在衡州府桃源縣南秦人洞後世傳晉時漁即放舟入洞即此及出其舟已爛故名其洲。

覆釜

覆釜洲在沔陽景陵縣治西以形似名即唐陸羽隱居之地。

孫洲

孫洲在杭州府富陽縣吳孫堅初為郡吏赴府鄉人餞於洲上父老曰此洲杖而長君其為長沙太守乎後果應其言且堅從長沙起兵為吳始祖後人因名曰孫洲。

蔡洲

蔡洲在襄陽府東北漢水中後漢蔡瑁居其上曹操嘗造

其家。

琵琶

琵琶洲在饒州府餘干縣治南水中擁沙成洲狀如琵琶宋汪洋詩塞外風烟能記否天涯淪落自心知眼前風物參差是只欠江州司馬詩一在處州府好溪上。

珊瑚

外國傳大秦國西南漲海中可八百里到珊瑚洲洲底有盤石珊瑚生其上人以鐵網取之。

虎頭

虎頭洲在撫州府城北宋治平中郡人李懽夜夢有人張樂送至洲上未幾登科授虔州司理蓋虎頭之應也。

蛇骨

蛇骨洲在南康府都昌縣東南晉永嘉中有蛇長三十餘丈斷道以氣吸人被吞噬者蓋百數許遜有神術率弟子往殺之聚骨成洲。

鷓鴣

鷓鴣洲在瑞州府上高縣羅漢石之東正當縣之水口。

老鴉

老鴉洲在雷州府抵瓊州府界四里。

楊葉

楊葉洲在九江府西半屬彭澤縣以東屬池州界洲上多

楊柳

蓮花

蓮花洲在南康府建昌縣西江心諺云蓮花到縣前建昌

出狀元。

迷子

迷子洲在應天府西南王安石詩洲荻藏迷子。

仙姑

仙姑洲在瑞州府上高縣西相傳有仙女嘗遊此。

門前洲

晉殷仲堪見流棺葬之旬日間門前之溝忽起為岸其夕有人自稱徐玄感君之惠無以報也水有岸為洲君將為州矣後果臨荊州又宋張興世初生門前水中忽起洲及

為方伯洲生至十餘處。

館前洲

館前洲在邵武府建寧縣東水中央狀如遊魚出水。

百里

百里洲在荊州府枝江縣東北周迴百餘里梁史陸法和有異術隱百里洲即此又縣有九十九洲未及滿百宋文帝在藩忽生一洲未幾嗣位。

萬石

萬石洲在臨江府南大江環其前袁江帶其後其地夷曠肥饒歲收倍常因名。

流桑

見水。

種荻

漢陽府城南大江中有劉公洲宋元祐中沙洲湧出知軍事劉誼種荻其上因名。

周瑜犒士

黃梅縣南大江之北有散花洲周瑜戰勝犒士散花於此。

張澄習軍

南昌府東湖之北有百花洲宋紹興中張澄建亭其上以習水軍因扁曰講武况志寧有詩又蘇州姑蘇山上及南陽鄧州城南俱有此洲。

○溪

爾雅水注川曰溪。注溪曰谷。注谷曰溝。注溝曰澮。  
注澮曰澮。

禹鑿

紹興府嵊縣餘糧山下。有了溪。越絕書。禹鑿了溪人方宅。  
宋王十朋詩。禹蹟始壺口。禹功終了溪。餘糧散幽谷。歸去  
錫玄圭。

越來

蘇州楞伽山東北有越來溪。與石湖通。郡志云。越侵吳自  
此入。故名。溪上有越成橋。

呂望得璜

尚書太傅呂望釣蟠溪於魚腹中得玉璜。溪在鳳翔府寶

雞縣東南谷中。石壁深邃。林木秀阻。中有石室。

歐冶鑄劍

若耶溪在紹興府城南。與鏡湖合。昔西施採蓮。歐冶鑄劍  
即此處。

茹蘭

茹蘭溪在池州府建德縣南。其源出迎春朝霞二洞之間。  
西流會堯城。

浣花

浣花溪在成都府城西南。杜子美至城都。劔南節度使裴  
冕為卜西郭浣花溪。作草堂以居之。一名百花潭。按吳中  
復冀國夫人任氏碑記。夫人微時。有一僧墜污渠中。為濯

其衣見百花滿潭。因名其潭曰浣花。又唐妓薛濤家於潭旁。以潭水造紙為十色箋。

九曲

九曲溪在武夷山。九曲繚繞貫於羣岫之間。出石鼓渡合於建溪。

四安

湖州府長興縣四安山。有水會茗溪。名四安溪。

雙月

桂林府陽朔縣南有雙月溪。溪上有雙月橋。滁州琅琊山側有明月溪。宋王禹偁詩。惜哉幽勝事。盡落唐賢手。惟餘舊時月。團團照山口。

七星

建寧府政和縣南有七星溪。發源銅盤山。入建溪。

餘甌

餘甌溪在浙江長興縣南。傍有餘甌村。故名。梁武帝時童謠云。王氣在三餘。乃於餘干餘姚。餘杭為厭勝之法。時長興有餘干山。餘甌水。餘魚浦。而陳武帝實當之。魚本作吾。吳越之音訛耳。

菴畫

長興縣西有菴畫溪。古木夾岸。叢條翳其下。朱藤蔽其上。如是者十里。花時遊人競集溪上。有菴畫亭。唐鄭谷詩。顧渚山邊郡。溪將菴畫通。按菴畫。龍色畫也。

成式去怪

處州東有惡溪。多水怪。唐宣宗時刺史段成式有善政。怪潛去。民謂之好溪。

路旻平險

祁門縣南有閻門灘。灘有二巨石。對峙如門。其水下流入鄱陽界。合於大江。灘善覆舟。唐縣令路旻開斗門以平其險。人呼路公溪。

躍馬

劉備乘的盧馬西走。至檀溪。一躍三丈而過。以免劉表之追。溪在襄陽府西。

斬蛟

宜興縣有荆溪。在荆山之北。故名。上通蕪湖。下注震澤。逕松江而入於海。周孝侯嘗斬蛟於此。

磨鍼

磨鍼溪。在眉州彭山縣象耳山下。唐李白讀書於此。學未成。棄去。適過是溪。逢老媪方磨鐵杵。白問媪何為。答曰。欲作鍼耳。白感其言。遂還。卒業。媪自言姓武。溪旁有武氏巖。

浣紗

浣紗溪。在處州青田縣南。謝靈運遊石門洞至此。遇二女浣紗水邊。靈運作詩嘲之。女亦以詩答之。忽不見。

希聲家溪

陸希聲居當溪之側。名其溪曰家溪。

子厚愚溪

柳子厚愚溪序。灌水之陽有溪焉。東流於瀟水。或曰冉氏嘗居也。故名冉溪。余以愚觸罪。謫瀟水上。愛是溪。故更名為愚溪。又為愚丘。愚泉。愚浦。愚池。愚堂。愚亭。愚島。作八愚詩。紀於溪石之上。

元結命名

浯溪在永州府祁陽縣南。流入湘江。唐元結自道州歸。愛其山水。因家焉。作大唐中興頌。顏真卿大書刻於崖上。結又為悟臺。唐亭石室。諸銘。宋陳衍曰。元氏始命名之意。因水以為浯溪。因山以為悟山。作室以為唐亭。三吾之稱。我所自也。字從水。從山。從唐。我所命也。三者之目。皆自吾焉。

此音吾

我所擅而有也

沈括入夢

丹陽朱方門外。有夢溪焉。宋沈括嘗夢至一小山。花如覆錦。喬木蒼鬱。山下有水。甚樂之。後謫居潤州。宛如夢中。遂築室居焉。因名夢溪。

茗溪

茗溪在杭州餘杭縣治前。發源天目。夾岸多茗花。每秋時。飄散水上。如飛雪。

竹溪

唐李白與孔巢父。韓準。裴政。張叔明。陶隱居。在泰安州徂徠山。日沉飲。號竹溪六逸。

甘棠

廣西靈川縣東有甘棠溪。西過白石湫。合灘江。

香稻

南寧府橫州西有香稻溪。溪傍產香稻。故名。

沐鶴

沐鶴溪在處州青田縣西南。相傳浮丘伯沐鶴於此。

蟠龍

夔州府梁山南有蟠龍溪。

黃浦

黃浦溪在山陽縣南。溪東南流者入射陽湖。西流者入雙清溝。

白洋

白洋溪在宣城縣。出華陽山。東流者經天門山。過寒亭。又經行廊山。入清弋江。西流者過魯廟。東北流者為魯溪。入於句溪。

藤花映水

宜興縣東南有東瀉溪。唐陸希聲頤山錄謂山前百餘步。衆流合而東行。故溪名東瀉。春時兩岸藤花。照映水中。青紅可愛。

桃花夾岸

陶潛桃源記。晉太乙中。武陵人乘舟捕魚。沿溪行。忽逢桃花林。夾岸數百步。芳華鮮美。落英繽紛。復前行得一山。



山堂集卷之十四  
有。小口。彷彿有光。便捨舟從山口入。初極狹。行數十步。豁然開敞。土地平曠。屋舍儼然。阡陌交通。雞犬相聞。其中往來種作。男女衣着。悉如外人。黃髮垂髫。竝怡然自樂。見漁人。大驚。問所從來。具答所以。便欲還家。為設酒作食。村中人咸來問訊。自云先世避秦亂。率妻子邑人來絕境。不復出。問今是何世。乃不知有漢及魏晉。此人一一為言。停數日。辭去。既出。得其舟。便扶向路。處處誌之。及至郡。詣太守言之。太守即遣人隨往。尋問所誌。遂迷惑不復得路。南陽高士劉子驥聞之。欣然欲親往。未果。尋以病終。後遂無問津者。

一縱一橫

丁溪在泉州府德化縣南。俗云水畫丁。羅簪纓。宋時一夕雷雨決流。一縱一橫。宛成丁字。邑人程楊休果登高第。

十溢十竭

王韶之始興記。連州水下流。名斟溪。一日十溢十竭。

溪有二灘

百步溪在台州府臨海縣西。溪有二灘。甚湍急。俗名大小惡溪。孟浩然詩。欲尋華頂去。不憚惡溪名。

溪有三源

八旬溪在雲南廣西府彌勒州治西。其源有三。一出阿欲山。一出舊村。一出北傾山。

道錫牽鼎

銅鼎溪在南海縣界南越志天清水澄見其中鼎鉉刺史劉道錫過此溪繫其耳而牽之耳脫而鼎潛入溪中民以為神又雷州府遂溪縣東南有鐵杷溪中有石似鐵杷故名。

茂叔濯纓

濂溪在永州府道州之西宋儒周敦頤家世於此後寓居江州而老於廬山之下不欲忘其所自因取故里之號以名其川故九江府亦有濂溪云黃山谷濂溪詩序春陵周茂叔胸中灑落如光風霽月好讀書雅志林壑中歲乞身老於湓城有水發源蓮花峰之下潔清甘寒合於湓江茂叔濯纓而樂之築室其間用其平生所安媿水而成名曰

濂溪按湓城今在德化縣城南九十里漢置柴桑縣隋改曰湓城

見俞兒

齊桓公北征孤竹國將至卑耳溪見一人長尺許而人物衣冠具焉右祛衣走馬前疾導以問左右左右不見也管仲曰此登山之神俞兒也臣聞霸王之君興則登山之神見且走馬前導也祛衣示前有水也右祛衣示右方涉也及至溪從左方涉其深及冠從右方涉其深至膝桓公既涉果得孤竹遂霸天下桓公遂再拜曰仲父之聖至此按孤竹今永平府古郡名

遇鮑姑

武昌府咸寧縣有蘋花溪相傳洪崖先生煉丹之地嘗見一老姥於此採蘋莫測所自來或問之答曰吾鮑姑也忽不見。

盧教棲息

盧棲溪在處州府景寧縣東有洞廣數丈唐道士盧教棲息其中洞旁多笋味甚佳亦號盧棲笋溪旁有竹無風自動。

庭堅遊樂

涪溪在叙州府北宋黃庭堅遷涪州別駕號涪翁後安置戎州遊是溪而樂之故名涪溪戎州今為戎縣屬叙州府董黯奉母

慈溪在慈溪縣西南舊名大隱東漢董黯因母疾思飲此溪水築室溪上以便取汲故後人以慈名溪。

李綱謫官

延平府沙縣七峰之下有太史溪宋李綱初以太史謫官於此故名。

徽之訪友

剡溪在剡縣治南一名戴溪即晉王徽之雪夜乘舟訪戴逵處。

思齊征蠻

湖廣靖州通道縣境有鑿字溪按廣西界宋元豐間於溪旁得古碑乃唐文視元年遣將王思齊率兵征蠻過此隔

得山險。負舟而濟。鑿石以紀歲月。而夷人以為鑿字溪。

### 太守脩禊

岳陽溪。在潼川州安岳縣西。太守彭乘臨溪鑿石。為曲水。每歲脩禊於此。名翰林灘。以乘嘗官翰林也。

### 仙人投丹

靈壽溪。在柳州府融縣南。相傳仙人嘗投丹於中。飲者皆得壽。

### 馬鳴

馬鳴溪。在叙州府叙水源慶符縣西。會馬湖江。達於蜀。昔土人鄭氏牧馬溪上。見產龍駒。朱駿頰尾高可七尺。將以為貢。至溪振鬣長鳴。躍入於水。故名。

### 虎號

虎溪。在九江府城南。晉僧慧遠法師送客。不過此溪。過則虎輒鳴號。故名虎溪。後與陶淵明陸脩靜語。道契合。不覺過之。因大笑。世傳虎溪三笑圖。

### 山影棹聲

宋張子野題無相院西溪詩。積水涵虛上下清。幾家門靜浪痕平。浮萍破處見山影。小艇歸時聞棹聲。入郭僧尋塵裡去。過橋人似鏡中行。已憑暫雨添秋色。莫放秋蘆礙目生。

### 沙平石淺

唐岑參東溪詩。溪水碧於草。潺潺花底流。沙平堪濯足。石

淺不勝舟。洗藥朝與暮。釣魚春復秋。興來從所適。還欲向滄洲。

白牛

隋王通號文中子。講道於白牛溪。

黃龍

黃龍溪。在泉州府南安縣南。宋王十朋詩。清源太守鬢蓬鬆。未遂歸農又勸農。農事方興天不雨。誰能喚起老黃龍。

四水激射

湖州府治南有雲溪。以其合四溪水為一溪。故曰雲。四溪者。謂苕溪。前溪。餘不溪。北流水也。一說四水激射。雲然有聲。故名雲溪。一名雲川。湖州古地名曰雲川。以此。

雙澗合流

虎踏溪在處州府宣平縣南。雙澗合流。昔有人擊虎於此。

東晉書在漢代中世國平無事。魏晉合流。世在人。新所公也。

魏晉合流

書